

25078

31-2

文284·3614

42

31



少寶書堂詩



往余在舒城時識沈生本陸者
袁簡齋太史門下士也高才博
學於文無勿能而古大家詩之
淵流升降尤規度矩合落筆
往之神似一日過余作文字飲劇
設至夜半始策蹇踏月歸去歸

沈生本陸

陸生本陸

不十日其家遽以赴告年過四十
落魄死矣傷哉及余歸里鈔松
江詩得上海褚君文洲生平梗
概嗚呼是又一沈生也君名華字
秋萼少為同縣曹畏壘所賞識三
十後往來吳閭間登靈岩探梅鄧

尉泛棹石湖香溪與諸名士極歌
呼嘯詠之樂後且走金陵以詩質
於袁簡齋太史牢籠一曲題品百
流天下士以詩為羔雁者無虛日
而獨於文洲以雄才目之蓋文洲
於書無所不窺讀而為詩離奇恣

肆去古大家不遠宜宿老宗工
見之無不歛手相讓也余未見
文洲兒子識之以為踈雋不脩
邊幅似沈生年近五十縱酒落
魄無子而死似沈生嗚呼士之窮
達命也詩之顯晦亦命也沈生生

長窮鄉下縣嘯歌於漁夫牧豎
間畢由心精一編如甕無友朋知
己之可託無兄弟子姓親戚之
可傳不遂散為飄風蕩為冷烟
者幾希矣是又沈生之不如文
洲也

嘉慶十六年十月同郡姜兆紳孺
山拜序

褚文洲小傳

昭文孫原湘子瀟撰

嘗問吳下詩人于袁隨園公曰長洲吳玉松上海
褚文洲華亭張子白客而僑吳者林遠峯方大章
皆一時矚目也玉松大章余識之其三君者輾轅
胸中已而於李味莊備兵席間識遠峯由遠峯得
交文洲文洲濶疎落拓不事生人產所居老屋蠹
蝨網戶性不近女入其室垂簾閉肆如退院老僧
時遊酒人跌宕于歌裊舞衷之間則又酣嬉淋漓
極嘯傲魁壘之致與予一見傾倒拉入酒家予不

勝杯杓君連醕巨觥醅陶竟醉朗誦其已未新春
書事諸作引所佩刀擊案且擊且誦座皆駭爲狂
生有避去者時備兵主持東南壇坵士翕然歸之
而吳穀人洪穉存諸先生亦時時來遊文醺無虛
日文洲韜精沈飲無蚤莫醉不一載竟以醉死君
童齷卽以詩受知同縣曹畏壘爲之延譽今集中
古樂府及咏史諸什皆少作也薄遊吳越與諸君
子濡染鏃礪詩格益雄放阨窮連蹇思慕侘傺無
聊不平可喜可愕悉於詩焉發之其奇崛處似昌
黎其汗漫處似東坡亦間爲朱絃清汜近大歷十

子蓋其清氣宿心發於妙指非以學而能故無學
而不能也所著有寶書堂集海防輯要木棉譜水
蜜桃譜硯譜歿後無子書多散佚其友改七薌謀
諸李筍香光祿爲鏤其詩僅得八卷烏虜文洲可
以勿死矣君名華字秋萼文洲其自號上海諸生
也

孫原湘曰予過黃浦其水澌迤而潛滄宜有雄奇
恣肆之才斲殫其間及觀備兵開閣延士一時褻
屐風流之盛希風珠履矣文洲死後二年備兵亦
亡重過其地登觀海之樓但見洪波潏泱雲水蒼

涼問曩時賓從俱已散之四方况如文洲者烏可得哉烏可得哉

寶書堂詩鈔總目

第一卷 古今體詩七十五首

第二卷 古今體詩九十七首

第三卷 古今體詩七十首

第四卷 古今體詩七十六首

第五卷 古今體詩六十八首

第六卷 古今體詩五十六首

第七卷 古今體詩七十一首

第八卷 古今體詩六十九首

文洲先生寶書堂集八卷余從伊嗣孫慶林處

鈔得雲間改君七菴見之屬爲付梓因乞姜孺
山先生爲之訂定存詩若干首其他著述若詞
稿海防輯要木綿譜水蜜桃譜研譜諸書尙待
搜訪以爲續刻同縣李筠嘉識

寶書堂詩鈔卷

芝草

果核成樹易竹鞭抽筍繁種芝本無術從空托靈
根堂北苔土積怪石如獸蹲苔青得雨潤土赤受
日暄有芝產石罅脆嫩初難捫稍稍加愛護各各
勢騰騫三本鼎足立色變何更番頂擁紅幾疊邊
圍白一痕愛此入畫態吟賞時開軒門慚烏衣謝
生階何足論隱非商山皓療饑安用吞風霜下秋
晚采供古澡盆仙品倘可鬥袖之登崑崙

上海褚華文洲著

端州正洞石硯歌

石堆米粟瀑走雷千人篝火青山開羚羊峽口風
雨歇磨刀霍霍割出紅玫瑰觸之恐碎呵卽溼肌
理細潤疑嬰孩粵海多年難覓得急試隄麩動顏
色平時欲笑墨磨人今日濡毫太狼籍吾聞下岩
兩洞分東西鸚鵡嘯喞卑枝栖豈若此硯直從正
中竇底掘上列金輪寶眼黃赤含晴鷺座閒一客
恰有米顛癖爲洗殘墨捲袖臨清溪蕉文火捺石
未有共歎扶輿之氣變幻無町畦精華所感頑者
巧山川映木月暈犀鎔君六州鐵棄君五斗泥天

工新樣不難覩但取革囊裏硯親提攜

齒痛

有脣故吹者脣有舌故出者誇欲飛而食肉何可
無齒牙 圓不必如貝白不必如玉克長堅牢大
滿所欲 匪火是鬱匪風是仇孰謂甘酸實貽之
憂一哺三吐痛不得休 言齒有蟲莫擣其穴抉
去乃瘳毋俾竊發譬彼月輪過望而缺

鐵笛引

虎邱七里鶯花窟曉起徵歌莫難歇中秋畫舫倍
常多處處笙琶相間發酒闌燭施人影稀異響何

來起林樾追尋共到生公臺吹笛老翁白鬚髮衆
人競借笛摩挲壓手冰寒重且滑質同黑玉光滿
身文比青苔繡作凸吳儂自謂笛通神上口無聲
驚咄咄虛亭圍坐試翁吹聽去宮商便清越曲終
腰笛抗手行鶴逝秋風勢飄忽羣歸檢點柯亭椽
羞取憑闌對明月

書先河南公臨本蘭亭後一百韻

先澤畱佳搗菁華海內傳看經千萬日寫紀十三
年帝正崇文學唐方慶蕩平功勞誠蓋世儒雅信
由天好起筵中舞時成馬上篇燕閒開鳳閣揮灑

滿鸞牋共服臨摹熟羣誇筆札妍百家探妙義八
法索真詮崔蔡裝爲冊鍾張彙作編雄豪秦以上
渾噩宋之前誰氏稱爲盛惟皇愛最專姓畱栖燕
巷人想浴鷺川或種春風竹疇移雪夜舩乃翁能
絕代厥子但隨肩江左無雙傑中興不世賢規時
殊侃侃投老尙惓惓在昔蘭亭會陳茲修禊筵名
公俱自至佳士盡相延裯布斜當石杯流順瀉泉
入山殊杳渺永晝快畱連結契音諧叶含情韻疊
填盛衰談寓理老少醉扶顛不限辭長短寧停思
轉旋側聞詩已就僉曰序居先紙具蠶絲淨毫抽

鼠鬣全文辭生娓娓波磔運絲絲虎臥龍跳橫銅
錘鐵煉堅羊欣輪勁挺索靖遜精妍寶貴南朝士
畱貽蕭寺禪辨乎徒守耳翼也竟偷旃布襪江陵
岍華驄京兆阡九重嘉命復五品用官遷拭拂書
香古低徊墨色鮮囊盛徵蜀府匣貯琢子闡是物
眞佳者其蹤孰繼焉秘書遙土壤鑒賞失輿權時
永興已歿殿內推尋切朝端歎息偏講求猶少侶
選擇迄無員鄭國欽元老瀛洲薦列仙鄉閭居浙
水父子職花磚史館宸遊奉郎官星次躔少曾鍵
戶鑰長復駕車駟徧閱穹碑藪窮蒐赤縣田淵源

咸不爽眞履定無愆此道憑元奧斯人克別甄丹
墀趨降詔畫省拜鳴璫暮鎖宏文發晨帷興慶塞
奉章珠璧合繕牘鷺駕聯畿輔均圭臬瑯琊允豆
籩題吟永和歲照耀越峯巔良會胥春暢清遊使
俗蠲句工心共愜蹟妙夢頻牽押署蘿枝附重池
鏡範圓殊珍初秘密勲第乞敷宣申命先公至教
摹王帖遒舐毫歡踴躍濡墨凜共虔榻欲登壺嶠
茫如忘粥餽靜參鬢屢撚諦視袖常揜旣得中情
合終勞右手胼算將羸奕子掃處奮戈鋌幅廣容
鈐印行分剩界鉛撫摹驚絕肖校對不嫌辱敬寫

臣勞爾恭皇帝快然獎褒來特至賞錫豈云髮髯
鬚形優孟流傳壽偓佺積堆空曠室捧抱小中涓
遠勝衣裘美庸貪食料羶侯楊裝後乘高李帶歸
鞞輝映瑤階級榮生朱戶屢曾元勤保護富貴竟
飄翮窗鎖巢蜚鼠臺頽落戾鳶饗殮籌腹果緇縲
易腰纏幸脫洪濤浸終逃劫火燁通身漿盡脫近
角蠹方穿破損龜紋錦模糊蝸篆涎棄傷農女蠹
盜阨鼓輦蕭滅宋元藏庫從南北走燕蘇黃題悉
好虞趙贊相沿紹聖時刊異奎章閣璽薦摩挲餘
釋子歎美到嬋娟迂叟雲林屋彝齋書畫船挈餅

垂隔代冒險出深淵閱歷興王四搜羅官鈔千鑲
頭挑把避夾裏拆由拳葉托麻充絹函裁木次梗
裂文昭舊刻板數辨重鐫皎皎窺林月疎疎曳翅
蟬濃磨螺墨染淡刮蠟黃煎上藝標三館鴻名徧
九埏歐虞推後勁顏柳讓先鞭美譽隨遷客孤忠
表墓塚揆膏徒剩迹醫國詎教痊苟活羞完瓦遐
陬頌直絃歸吳哀語鶴望粵血唳鶻座映丹庭柏
堂依碧水蓮公祠臨西清芬餘簡帙手跡比栢椿
世遠終存篋家貧不賣錢却當珍擬壁慎勿散如
烟體麗新模楷芬含古蕙荃吾齋茲長物鄭重視

青瓊

黃浦四首

明季海寇來昏夜薄城牆誰其禦者民夫揚國
初海寇來侵曉泊水湄誰其殉者守將司迅霆下
妖星滅血灑鯨鯢尾中截颶風高波浪惡樓船戍
卒春糧炊臥打寒更沙際泊君不見牖口蒹葭青
接雲戰鬼歌泣人常聞

望浦水臨高臺帆檣燈火照天地鳴鉦吹角聲喧
逐權場貨物從何方竹王郡國鯨人鄉來船裝糖
霜去船載木棉去船未買藥斑布來船又賣金絲

烟漁師捕魚不滿簾羨殺來船與去船

修築浦口岸填塞浦口橋居民半城內汲水愁路
遙一朝下令忽開壩沿城小港仍通潮外水到旣
激內河淺不挑潮來兩度頃刻消河心一勺剩餘
漑渾黑不堪供澣滌每遇東北風高時依舊出城
擔水喫

潮入南城門平地沒足脛潮退西城闔通衢積泥
凜不須春信添三篙潮常打岸聲怒號行人問潮
何爲爾浦東土塘如屋高一里一隄五里一壩我
聞古者白圭以鄰國爲壑今乃自以門庭災移之

入房舍此事民徇其私告之官官殊憤憤爲所謾
望土塘一長歎

宣德鑪詩

吳趨佳麗地好古家八九鼎彝重三代所嗟世稀
有不如勝朝物容易別妍醜鑪製仿宋莒大僅逾
土甌矮足承廣腹修耳連旁紐窈窕雲雷騰紛拏
龍象走饕餮巧藏身狡狴怒昂首當底忽凹凸至
邊忽麤厚能匹漢溫壺豈數莽刁斗撫摩發光華
拂拭去塵垢一一開篋陳古豔驚戶牖聞之鼓鑄
始制作期不朽鑿山采善銅募工擇好手烹鍊千

百回質清若官酒初年尙燒斑顏色多紫黝却用
蠟微染兼以金細鈕雞皮皴滿體祥雲涌齊口茶
褐與茄青相映若錦綬歛識有時無罅漏亦其偶
後乃漸素朴灰鹵勤剔擻磨取玉爲礪洗縛絲作
帚重暈散晴烟微黃探春柳色嫩戒捫執聲清耐
擊扣品題分甲乙濃淡別先後火氣養旣深精瑩
耀雲母厥盒內府密斯世價並售間有估販徒僞
造營利藪一遇具眼人真贗自不苟真者攀琅玕
贗者棄稗莠寶貴緬在昔何況年久久

野泊

初月乍落山蒼茫星光青赤天雨霜上橋沾酒人
未至泊岸待渡船相望更無林葉墮流水時有沙
鳥鳴寒塘燈花一穗照書結坐擁爐火清宵長

讀秦本紀

鶉首何曾醉賜秦天教舊事盡更新一官墨綬難
傳子百畝青苗許賣人治法古今情各異書生成
敗論空存若將戰國諸侯數才畧誰堪望後塵
計竭中原議合縱函關自守一丸封風塵道遠疲
羣鹿雷雨天空起蟄龍俠客漫酬知己死降王終
作屬車從請看封禪雲亭上更有穹碑覆古松

宮樹陰濃障夕暉二陵西望勢翬飛門高儘放旌
旗入殿廣常愁歌舞稀到海路危鞭石走開邊略
盡築城圍生平只欠神仙福悵悵樓船去不歸
豐鎬關河百二開誰提萬騎此中來不持鋒鏑皆
強敵必讀詩書豈雋才竹簡已飛風際燼金人空
繡雨餘苔蓮花峯下星星火指點咸陽亦可哀

晚坐

梅花結子柳花稀春逐東風荏苒歸雨一回過茶
漸老蠶三眠後豆初肥酒懷欲變溪成釀遊迹還
同鳥倦飛多事兒童呼月出又關幽興啟柴扉

月麓和尚碑

和尚姓趙名孟僖參文丞相軍事宋亡爲

黃冠後入釋居郡城本一禪院今雲峯寺
北軍夜擁都督行帳前奇士哭失聲勤王義旅檄
難起回首眼見滄桑更閉門嬾掃空廊雪自憶興
亡夢中說學仙學佛兩無心此身但與塵緣絕君
不見臨安臺殿荒梧楸六皇龍種編九流益盛脫
粟甘獨茹弗騎欵段西河遊一坏遺塔青苔古骨
化王孫節彌苦行人若弔宋遺民豈止西臺謝臯
羽

蘭子二十韻爲北居丈賦

蘭蓀九節老烟嵐膏液纔收見子含並綴高枝青
漸長斜分勁葉碧相參纖纖海嶠虬弦月濕濕梅
天吐繭蠶傍几疑花香莫定隔窗如葢色初酣性
貞詎肯榮蕭艾質美無須染蔚藍六幅裊遮羞李
嫁五更風好笑桃貪毗依芝玉光難掩比擬兒孫
佳最堪羅宅生階徵種德鄭宮入夢信宜男蘊來
深谷瓊瑤貴釀得清宵霜露甘度暑濃煎茶灌土
御寒低束薦封餼殷勤培壅勞人力多少萌芽共
母函除歲始枯厨婢護經秋不落圃師諳倘抽嫩

甲根居半待試芬芳春幾三泉石之間長靜寄松
篁以外足幽探區分草樹拈毫咏考証杭閩翦燭
談似米囊休炊入饌如蓮的豈采盈籃譜添宏景
誰稱博操續尼山我抱慚此日雙莖藏羽毳他年
九畹散醲醢朝川逸致黃磁斗畏壘奇情綠磊龕
緣磊龕卽畏壘
山房小軒名
自把芳叢春浦藝不煩移植到淮
南

董仙

董杏芬沙岡人爲鈕星巖家塾師得遺
書讀之通仙術預知死期及葬舉棺若
無屍者後里人
乃見于吳中云

董仙隱居浦水干教授無異儒生酸背人習得鍊

氣術通明殿裏爲從官九天仙侶芙蓉冠身騎赤
龍翳青鸞夜深密室來講道壁破常被入偷看高
談禍福必奇中事後乃悟當時難一朝臥病絕粒
飲妻孥紛紛淚暗彈有客操舟別村過逢翁扶杖
容顏歡到家却驚翁屬纊始悟屍解神仍完梅花
滿隴葬翁處但鋤黃土埋空棺蓬萊咫尺竟弗返
悵望滄海愁波瀾

河南翁

河南老翁老服賈販楮入山山有虎山家搖手戒
勿行翁強欲前興飛舞筵中滿飲酒數觥火器先

儲任翁取揮鞭就道曲折行缺月娟娟半規吐忽
聞風聲樹底鳴虎眼如燈翁早覩持槍發火虎未
傷虎怒來尋離步武翁乘虎間捉虎皮虎亦與翁
共掌拒咆哮虎口向翁開槍忽入喉虎身俯創深
虎死翁尙疑猶張空拳打無數路人侵曉見翁狀
擁翁歸家啟蓬戶衣裳血污爲湔洗臨別家家供
酒脯誰人今有說虎癖爲道此翁亦千古

野祠

三吳淫祀多不經人皆畏神神乃靈錦袍玉帶貌
豐美中庭宛見侯王形蛾眉少婦才廿齡每遭侮

辱其聞腥豈妖狐老成精力能竊物開重局公
然飲酒復啖肉夜行燈火光熒熒殷闐車馬宿何
所荒陲矮屋朱爲櫺朝廷幸有三尺在昔曾赴訴
中丞廳赫然下令達山寺鞭撲土偶加常刑紛紜
供帳付一炬官惟獨斷人怕聽神司禍福亦妄語
慚魄駭竄歸宵冥雞豚今更欲誰媚愚眈如醉呼
難醒迎神歌舞送神拜神巫出門曉戴星

鬼妻

錢月娘字蓮仙元錢鶴臯女康熙
壬辰青浦陳祐成遇于墓所成婚

紅巾殺人城一空人願致死爲鬼雄錢郎本非守
錢虜傾家結士松江東養女細弱柰女何白日送

女窟室中驅軍苦戰竟敗歿女饑欲出無門通漆
燈未燼命先隕魂魄夜夜啼春風泉臺擇婿恨鬼
醜生人可嫁寧嫌窮道逢陳生貌勝鬼欣然要誓
心相同從歸客館秘形跡比鄰窺伺牀仍空生耽
鬼豔博鬼趣時薰香襲鴛幃紅明璫翠羽一來去
月斜風打雙梧桐

田莊奴

江頭野航小于屋夜有淮南來寄宿囊中藏鏹五
百緩酒醉開囊露人目篙工本是田莊奴見物貪
心如虺毒月斜解纜到江心劫客求財客驚哭傾

資贖命那得全願入波濤葬魚腹二人縛客鐵猫
端拋擲深淵生已薨豈知神來攝向空墜落田莊
主人屋闔家駭怪喚客醒餉食羹湯易衣服須臾
二奴扣戶歸見客在堂思竄伏主人取猫怒擊奴
還使沉江巧報復搜金畀客客不私神宇灘頭新
版築卽今大東門外雲臺禪院來遊不少負心人碑石摩挲那
敢讀

東坡云予在黃州每過陳季常輒作汴字韻
詩一篇季常不禁殺故以此諷之今烹炮
之奢又有過于髯蘇時者余因次其韻爲

同志者勸

萬錯調杯羹百味取椀汁微物皆生靈無論化與濕世人貪鱸肥捕捉期必得被刃身旣痛偶脫情亦急嗟嗟三吳地常品視鶯鴨烹飪出愈奇鮮香出重鱗安知庖厨下池流染爲赤口腹爲物累物蠢誰訴白食單選旣窮呵斥猶岸幘鳥乃驚九飛魚乃過河泣蔬筍能饜飫于我竟何缺解網緇作聖彈缺賤稱客我本孔氏徒戒殺和蘇集

春城漫興

東風濼濼動青蘋岸草溪筠入望新大抵曉天微

帶冷從來江景最宜春沙禽能喚提壺客羌管偏催折柳人哀樂此中如兩忘擬招莊惠與爲鄰

與張菊年丈夜話用謝惠連泛湖歸出樓中

觀月韻

月圓蚌胎滿珠池動蘭橈一輪出海底搖颺初生潮高亭同倚望有客不待招坐久更漏斷濃露下山椒林影動難已瑟瑟迴涼颺數點芳馥花忽墮叢桂條心疑濯冰雪身若離塵囂吟賞莫輕別風雨愁來朝

雜擬

世人貪酒色骨髓先已枯服食煉金丹每咎效驗
無方書豈盡假難壽不壽軀試與神仙食仍甘如
醍醐譬彼萬里風鵬搏入天衢鷓鴣隨之起一吹
落泥途

松枝落影黑螢火疑燐青人所不震駭鬼神難爲
靈人臥讓鬼出鬼乃見其形人病邀鬼食鬼乃竊
所馨與人日作劇豈鬼獨得寧卓哉嵇康語述之
鬼怕聽

題鄔義士從戎紀畧後

康熙十七年鄭錦寇漳泉制府募兵江浙

義士帥其徒百人効力行間所向輒捷奏
署左都督會奉部議輟姚公兵授新帥鄔
畱隸姚麾下及臺灣平姚已先賞拜日卒
無白鄔前此功者遂不得授官歸著從戎
紀畧一卷傳世義士邑之浦東人

鄔義士人中豪幼慕班定遠自名爲景超讀書萬
卷腐儒耳常願揮鞭去鄉里傾家結客百餘人事
鄔爲兄肯效死康熙初年諸國除臺灣竄竊鄭氏
餘如蠡之房如燕之壘在海中央居逋逃絕島已
非策乃敢登岸窺皇輿妖星照南紀經年光不

滅人人思飲蠻奴血義士椎牛饗百人到家忽與
妻孥訣裹糧曉夜渡仙霞道無行人官建牙直前
奮袖擊鼉鼓制府動容延入座指陳方畧皆出奇
盡令編入親軍伍朝蓐漳州食暮結金門屯賊營
如牆立海濱義士大呼馳殺人賊帥旣擒餘賊奪
船遁軍門紀功亟上陳署官都督 命未下濟師
有期忽中罷澎湖五六月戰艦揚白旗國軒納欵
克塽縛誰其主者通侯施義士姚公舊僚從終屏
田園不見用老去霜雪盈髭鬚行沽市間手提壺
丈夫終牖下常自生嗟吁嗟乎身爲封疆吏禦

敵同屏藩制府功當勿言身爲草茅士報國佩橐
韃義士功何可緩登樓望四野弔古心煩寃孰爲
後來者更招義士魂君不見從戎始末僅得見此
篇百人姓名已不傳

趙徵畫棧道

高不踰休牛山深不至彭蠡波相逢當狹路其間
平坦能幾何驅飛騎渡絕壁燭龍咆樹巔黃能號
礪側行人雖有大羽箭逃竄青蘿射不得問君何
不買犢躬耕田乃命如秋霜與朝烟思歸樂行路
難望遠道心悲酸

寄贈吳玉松

十年滄海上傳寫社中詩
燕子烏衣夢梅花玉笛
悲未教談笑共先許
姓名知燈火高齋夜孤吟動
我思

殘雪臯橋市曾爲訪友遊
山樓晴貰酒野渚曉維
舟歌舞生春暖鶯花散客愁
此時吳季重把臂恨
無由

尺書傳妙墨落落古人情
有道交逾厚能詩論更
精地遙黃歇浦夢繞闔閭城
何日攜茶具林泉鼓
櫂行

乾隆己亥六月有大蝴蝶至于室復縱之去
瓊林采香歸鼓翅倦日午忽然搏風飛吹落江之
澣昏黑一室中陡入殊莽鹵拂棟墮纖塵疑爲燕
初乳諦視乃巨蝶顧我亦快覩文幻古錦張目炯
夜光吐漾漾垂雙鬢簌簌動六股應有滿谷花飽
食在腸肚厥種吳所無使或出仙府偶托赤城雲
豈避殺陵雨主人性好生捕捉不汝苦特恐蛇鼠
輩深夜肆威武我開窗瑠璃任汝返樂土羣育勝
蠶蛹孤栖同鳳羽萬里月空明行行翔且舞勿到
童孺手螻蛄將汝侮

淮南王一首題畫作

淮南王好神仙高吟招隱攀桂樹丹成拔宅上九天
闔風吹醒繁華夢雞犬紛紜走相送回頭望見
漢王宮曳倒金人鑄翁仲滄海翻桑田沒更椎魏
碑書晉碣君莫笑春草柔春草埋盡英雄骨君莫
嗤秋霜薄秋霜飛上姬姜髮何如淮南王丹成拔
宅上九天長生不死住金闕

無題四首次王澹香韻

春情如水復如絲綺麗文章薄倖緣渡水楊花傳
妾恨繞牀梅子憶郎年斛量珠綠真宜換屏隔絲

紅莫浪牽拾翠分香前事杳寒灰空畫酒壚邊
香澤當筵記解襦西堂芳樹露凝珠門前夜永收
魚鑰井口秋深轉鹿盧醕我且尋陳狎客毀臣一
任楚登徒紅袞不散金釵墮月影沉沉下古梧
天外巫峯碧露尖朝雲暮雨夢魂甜丁寧角枕忙
中錯涕泗羅衣別後添錦軸三千風阻棹瑟絃廿
五月當簾重來信斷唐昌觀鸞扇金車何處淹
於越夷光魏夜來晨粧初對畫屏開浴從粉甃香
難狀坐隔冰綃玉可猜寄咏白頭愁怨語餞春藍
尾別離杯烟霞蓬島誰回首江畔空教築舞臺

雜興

積土爲臯山不如俯看極浦上潮初銅鉦聲亂青
林外數葉輕帆到海魚

高烈女詩

古來女子命無常幸則爲冀缺婦不幸則爲衛共
姜哀哉高氏女許字周秀才秀才有才壽不長病
亟藥石不得醫盧扁無良方烈女聞之心旁皇夜
夢大驚恐朝傳藁砧亡妾生何爲生乃孀出高里
登周堂閨中拼擋七年力買一頃地庶幾玉骨同
埋藏解我紅羅巾開我蘭閨房白日照人慘無光

孱軀氣盡懸雕梁爲樹不必連理爲鳥不必鴛鴦
俾後人書之曰貞烈某人之妻某氏女乃爲千古
存綱常

招雉山梧軒小飲

午日杲杲午風疎庭除社燕飛來初落花紅厚一
尺許蓄水綠量百石餘取醇酒飲便成佛與故人
談勝讀書結社同是江左客吟情久別當何如

青浦

吳江艇子似浮瓜轉掉沿溪風勢斜石碓響春東
路米竹爐暖焙本山茶白跳沙際魚卷尾紅出林

端樹放花笑我何時塵事了買田便向此移家

自青浦至辰山居二日

青山碧展仙人掌招我烟波盪蘭槳蜻蜓飛破滿
湖風枕簟如凌雲霧上橋門跨水浮截筒條忽過
眼由中通農家忽落船尾後畧觀墻角花枝紅橫
雲不斷蕭蕭竹到此山前有華屋便以兼旬襍穢
塵快向金盤幾回沐宵來風急雨却無赤日壓午
融洪爐峯巔豈乏避暑地攀蘿未到汗已濡不如
小窗睡初起看山暢飲丹泉水

六月十八日大風雨作

秋堂疎雨散暑蒸玉盤紅冷瓜無蠅若宵飲不揮
蜀扇欲午睡必添吳綾嘈嘈檐瀑未停響地久龜
拆理亦應豈知雨師怒旱魃盡驅瀛海蛟龍升山
川從之敢汗漫濃雲如墨油然與湘簾羹羹忽晦
冥繼作萬丈風奔騰疾行反退苦健特奮擊難上
愁蒼鷹塔空庭樹盡斷折石落土岸紛摧嘲我鄉
黃浦接大海潮遇風信偏如增直衝壕塹入城易
潛通溝穴登堂能盧仝破屋近水住竹窗二十樓
一層藥蘭筍塢置高處階前幸勿成溜澗但恨壁
古柱礪爛力與風鬥殊難勝石牀遭漏似醃酒畫

屏迸碎疑裂繒寒帷倏焉匪相識排闥急甚將悞
磨紙紛紛亂架上冊火號號動尊前燈宵深恐屋
卽傾倒坐擁襪被心兢兢聽聞喧闕宜塞耳夢魂
憧擾聊曲肱蓮枝漏盡天就曉漸解激怒平囂凌
障空乃失霧氣黑震遠始辨雷鞭鼙橋危幾悞過
客屐竈穿聞拊鄰翁膺破門雨花透濕檻低牆苔
痕高沒稜偃山竹樹倒坡桂飄池荷芰翻溪菱茶
壚欹側倚諸石花幡卷縮弼以繩吾廬近市尙如
此野外虛曠奚依憑北城城臺往獨上闌干我試
臨風凭空郊寂寞冬景肖洪濤洶湧烟光凝珠簾

繡柱入水沒峩舸大艚望陸登翼飛或可許巧匠
杯渡恐未容山僧我聞村農居下隰一夕大半爲
鯢鯨莫逃深淵命奚問偶脫巨浸形終宛或從蟬
蛭栖巨木或並牛馬升高陵盡人器用屏棄地闔
家老幼束縛緼得牀難臥使神耗食魚無飯致腹
癢老翁見慣熟占驗遇人話舊頭鬢髻云潮若此
風更烈廿餘年來觀未曾心煎百憂待水落各尋
居處搜行滕何人衣裝漂尙在誰家堂構舊可仍
玉棺散失不知郭佳城頽塌休談滕谿谿晴沙亂
石走斑斕遠隴黿鼉乘田蕪草青青已茁堤長泥

滑滑足憎我營我舍乘之亟爾新爾阪築之隕誠
欣閭井獲協比正慮疆理荒高曾奇哉東南稻尙
短濃綠又滿三吳媵孰司志載仿史筆冬蟲不害
當並稱傷人固云疾痛事有收尙曰休祥徵秧歌
村舞作秋社厥求司嗇降百祜爲文紀此拙序事
爰作長句金牋贈

擬古

大椿一春秋八千歲乃止彼其視滄桑直如蹄泮
耳商亦何有宮周亦何有壘龍刼迴爲環塵埃雜
紅紫中覲好名人尹且無乃是術妙得長生道高

烏乎死欲名垂久久請從功業始

析薪難作炊不如不種柳沉醉無高吟不如不飲
酒辭佳鬼神吝乃出文士口金碧浣火蠶花月陳
荔狗不奇險而古但真實則厚下拜雅頌師上揖
曹劉友百家當此時羞避若新婦

吾人富文學可弗尙意氣浩然如長虹垂天貫大
地具此磊落情窮困豈必悔伯輿曠世懷巨源一
生醉出而任廟堂亦能了大事若遇陳元龍當作
何位置

粉白黛則綠中有妍與媼不能辨二者安用明鏡

爲聞昔江心鑄擇才頗瑰奇塗以百鍊錫飾以雙
盤螭神光初遠射鬼魅亦畏之繼乃蔽塵霧照物
多差池磨治故質露舉世將毋疑

不能爲松柏碧蔭垂危崖婀娜厥枝葉來作園中
花氣媚散龍麝色豔攢雲霞托根未云固開遍干
株斜風雨陡然至零落餘枯槎芳華旣已歇脉脉
誰爾嗟

衣服吾附麗有禮身乃安遇人苟粗率何不隱岩
巒翠嶺五臺山厥蟲名號寒匪梧枝亦集匪竹實
亦餐自謂鳳凰鳥不如彼羽翰歲之冬雨雪毛落

西風酸夜月照巢冷槁葉被體單鷗鷺尙有愧何
以侶鵝鸞

鳴鶯人所愛啣穗藏其窠鬼車羽肅肅未傷一莖
禾秋陰復多雨夜半成羣過惡聲聞隔隴老稚思
張羅取廉已可厭饕餮當如何

勇士捕猛虎奮擊不顧身月黑夜漏半縛取驚四
鄰方虎勢難遏萬獸畏怒嗔非虎能制物物自喪
厥神一遇豪橫者就死如窮魏熱血和杯酒斑皮
施臥茵人固不畏虎况以人畏人

娟娟蛾眉婦舞袖凌曉烟恐失傾城色定情及芳

年行攀粵林桂歌采湘江蓮妾色正艷美君意方
纏緜繫石作酒尊鑄鐵爲酒船二物不穿做兩人
豈棄捐色衰意自好藉此盟誓堅

舟過余山出蛟處

青林雨溼蒸朝暎蝮蛇蟠枝毒霧噴雉方震响蛇
不吞就之伏卵匪其婚下入九土深無痕戾氣乃
獨鍾乾坤一宵疾雷奮天闔填填地底驚妖魂蜿
蜒出穴若可捫陡然作勢向上奔長風吹雨如翻
盆黑雲萬隊遮天昏千尋古木不困臀碎石飛走
鳴山根號啣婦女徒扃門吁嗟生命蝨處禪茲予

放晴來山村繫舟岸側持酒尊室廬僅覩什一存
木棉焦枯稻不磨結茅炊爨中田蹲那許餘地安
雞豚蕭條叢竹環土墩羣言蛟孽實此屯遭蛟掉
尾竹爲髡餘水一勺腥且渾其水淺才容足跟變
化理幻從誰論君不見雪天伐蛟地脈温以刀剖
卵熟可殮嗟人於蛟非寡恩除惡例逮孥與孫

江行

青山秋更好欲往駕樓船鷗鷺中流滿亭臺上岸
懸風微無復浪島遠遂如烟隱約漁歌裏揚帆破
曉天

沿堤數株柳此逕入淞江水束蜂腰壩沙排魚齒
椿初暘紅射地濺水碧流窗似欲爭前路舟鳴巨
鱗雙

清江呼白鶴白鷗昔曾栖之子居其北而吾去更
西林光寒隱約塔影遠迷離何日蓬窗下高談共
黍雞

放艇荒祠下潮平日正曛江風吹佛面陂樹落雅
羣茗熟秋天晚帆橫川路分雞鳴塘漸近鄉語隔
林間

東風半宵急吹渡碧瑠璃白塔過已久唯亭到可

知燒殘三尺檠閑話十年詩畫壁重遊處樽前憶
柳枝

赤檻青帘子人家兩岸通板簷松樹下運木塹流
中歌響聞墟落山高見遠空齊門西去路圖畫出
天工

爲眉峯題潘湘雲圖

湘雲晚出吳王府白下千人廢歌舞韶年不知春
可傷愛看梅花枝幹古疎疎散散香作雨石屋圍
墻封蠃戶簾開望見朱顏誰司隸兒郎好眉宇異
才斗石豈足量早握珠盤搗鼉鼓大槐貴客車馬

多俯視王公亂鱗羽銀槽獨壓蔗汁流畫眉曉醉
梅之圃東風東風亟吹汝詩腸肯爲紅妝苦簫聲
吹咽鳳皇老落英夜夜胥江滸傾筐細實竟離披
暖日烟塵暗南部犀簪繡袴灰燼飛籬落成陰叫
桑扈梁鴻塚頭月一輪泣向鮫綃更描取

造玉松話別因畱小飲作此畱致墨莊容門
雁奴啼寒霜滿天我行欲歸呼畫船爲誰遲畱棹
不前故人戟闕城西偏讀書謝客名四傳勃如鳳
噓龍噴涎有時獨往烟中川目送蒼翠心陶然我
來適逢把瑤編暫停雜誦迴奔泉驪黃牝牡持論

堅不以皮相賢時賢刻鳧爲觴戒未愆公榮歡飲
可甕邊月明好事爲客圓照此四尺蹄豚筵汪君
吾黨士宜同賞月色兩往訪之俱不值滕君却住
壕水南路簇繁華難辨識畱茲欲盡不盡情布帆
別後長相憶

雉山以詩招予同子乘爲鄧尉之遊次韻奉

酬

呼取至奇客移來不繫舟月明離岸起水響挾橋
流花豈詩能肖山惟酒可酬生平湖海夢相約共
沙鷗

自木瀆至鄧尉

篷底星光透隙寒吳歌清唱到更闌青山兩岸橫
塘路輪與舟人倚棹看

嵐翠空濛月影孤落燈風冷曉啼烏橋門跨岸如
環小不放瑠璃出太湖

司徒廟古柏

湖頭古祠六株柏柏身高大闔郡無山僧築壻遮
不盡一半露出烟模糊敲門客破苔蘚入株株拏
雲攬地交枝柯中有四株年最古石闌護之名可
逐一呼古者中空容人立怪者橫倒用杙扶奇者

盤裊而上如被籐蔓縛清者層疊不亂若從圖畫
摹邊頭二株較此稍低亞枝葉蒼翠豈有殊我來
苒砌已許久日色猶未穿庭隅想得夜深風雨滿
空際根自乾燥但頂濡君不見環祠梅花十萬株
海漏香雪連天鋪吾恐此柏化爲羣蛟青色喧起
舞揚鬢掉尾欲向波濤趨

靈巖咏懷古蹟

夫壻黃池去塵生白玉牀愁看雙蛺蝶夜夜宿花
房館娃遺址

泉生一峯頂魚畜半天中不共凡鱗隊江湖戲落

紅浣花池

香雪海

舍舟太湖登陸行梅花夾道先來迎山前約一二
里許白出籬落枝參橫香甘雪潔固可擬名之爲
海疑虛名山僧說梅果海似走至山半看可驚諸
峯環地規珙璧極地隙處皆花明以花爲海海不
小農家併力種此成凌空闌檻一徙倚瓊瑤萬頃
浮蓬瀛春風本拂波浪起却送香氣來軒楹此遊
惜及元夕後日落無月當風生芬芳向夕罨嵐翠
然已快意殊江城花多但可得大意休逐樹辨瘦

與清倚君歸坐矮屋下摩挲孤幹亦少情

鄧尉山還元閣

言尋給孤園遂上須彌頂閣虛還其元諸天照高
迴峯峯數河沙而入一莖莖功德非布金臭味非
烹鼎衆香國中香浩乎渺滄溟簷蔔同妙觀觀妙
鼻亦醒聲聞辟支乘宗風在何等比邱與優婆袈
裝壞色褻豈汝意念忘色相善窺訶過午食方飽
齋厨烹春茗如是醍醐甘于我惠然肯居士誰參
禪三四坐相並日沉下蘭若迦陵答人警

宋時古梅

烽火崖山事杳然
開花重到泰平年
不同怪石馱
燕馬曾與冬青泣
杜鵑老衲摩挲頭
似雪空岩零
落草生烟至今
蕭寺題詩者
文物猶思宣政前

劉仙史歌

玉雞高唱金雞聲
金雞一聲雞盡鳴
蕭蕭風雨鳴
不已化爲怨魄哀
三生嗚呼美人劉仙史
螭首蛾眉照閭里
嫣然抱瑟入軍中
桓温老婆妬欲死
腰橫寶帶柰若何
白挺驚破紅裳歌
摧頽粉面入苔土
衾裯雖香裏則那雞
栖于埽復于桀
此身何堪與同穴
風濤午夜到虛壇
辛苦扶鸞向君說
佳城

更卜虎阜根
晨吹畫角開盤門
年來寒食花事闌
有客酌酒同招魂

題吳玉松浮湘圖照

東浮汶北浮渭
不如南浮湘水長
九江至巴陵數
百里西風落木雲霧凝
秋光小魚食水如糝糠
大魚尾篔簹月明泝流來
武昌襄陽好兒女腰佩雙
明珠中流樓船載酒沽
九疑九點看不足掛帆直
至衡山隅岫嶺有碑青
赤明珊瑚斑竹千尺瀟湘
之濱丹鳥丹鳥色何紛綸
三峽阨塞不可入
蟻啼花裏聲悲辛
君行掩耳不欲聞
手撥雜芷叢蘭芬

大兒少司命小兒雲中君淮南八公拜匍伏况乎
區區橫槩雄三軍贈君以金盤洞庭之果飲君以
玉甕鄱湖之春黃鶴何年更來下爲我詢問湘夫
人

歸舟述興

看遍吳山欲暮春歸舟路指海之濱林泉野外多
精舍文酒燈前有故人虛白接天湖水漲淡黃搖
岸柳枝新此中大可經年住魚淑花村我卜鄰

寶書堂詩鈔卷二

上海褚華文洲著

題徐瑤圃畫明賢遺像冊

冶金鑄少伯買絲繡平原不若徐翁寫真好鬚眉
凜冽千古存石壁刊子美屏風繪香山不若徐翁
彙成冊諸賢并列尺幅間貂蟬著冠袍服紅翁之
遠祖文貞公幅中者誰氣如虹容臺善書官秩宗
父守土子從戎一門報國夏考功大樽文章伯靈
秀奪九峯李公字存我沈公諱猶龍數人明季皆
盡忠徐翁一生多見聞良工心苦留餘芬令子繼

峯更好事橐筆來畫飛將軍瑤圃子繼峯至海上更以喬忠烈像補入
人可傳畫不朽破篋常令鬼神守想見五茸城西
風雨天夜夜光芒射牛斗

海棠

春雨抽絲出海棠開花不向葉間藏歌頭嬌小綃
衣薄賦手疎狂錦帶長紅欲留痕烟弄影白還生
暈酒含光何人更有如天福消受昌州三月香

為農難

耕石田為農難駕薄笨為商難不商不農為士亦
難一解熱不休惡木陰渴不飲盜泉水羣稱善人十

手所指二解十手所指自返則危君不見受水而器
欹過望而月虧三解

鼓瑟高山上

鼓瑟高山上聲大滿水涯君子聽之廉平悅其懷
衆人豈無耳有耳聽亦乖謂是音律不諧一解問君

瑟何如朱絃而疏越餘音猶在空久久乃消歇二解
瑟絃數五十宮徵無差訛塗人聽之和以嘯歌師

曠則那三解

有斑者狼

有斑者狼居水之渙妖狐妖狐媚之不已狼喜提

其耳解一狐豈不黠畏狼叫囂嗟嗟妖狐見狼則媚

見人乃驕解二亦有騶虞麋鹿為伍狼怒而顧無所

用其武妖狐妖狐何以自苦解三

鳳凰之威

鳳凰之威不爭一毫太上立德匪以為名高黽勉

從之勞心忉忉解一我登衡嶽言送其轡望之則遙

行亦可至蟻封孔多無益于事解二自聾而愈者不

聰自黑而染者不紅蚩蚩之氓難與圖厥功解三

與中齋兄話五世從祖復生公遺事

先公少有任俠風揮金結客心豪雄槍槊學為萬

人敵豈特韜畧能精通曾腰弓矢騎駿馬襍被隨

父遊秦中中途巘險林莽黑暴客卒起來相攻持

刀斫公公奪取大聲一喝兩耳聾聵子豈足污吾

刃入手斷折如春蔥數人驚伏馬首拜公笑不顧

行控億茫茫關隴去何托烽火照天民已空挺身

奉父累騎返遂乃拊髀思從戎南都草創廊廟小

防江命將資成功公以兵部主事何忠烈公薦授伏波營遊擊將軍未之官波

心鐵鎖燒未絕降牋先達江淮東神州底定洗兵

馬何庸更著征衫紅藝傳鄉里作遊戲子弟身手

皆能工承平百載衣鉢渺誰談逸事白髮翁近遇八十

翁李其談公事甚悉
李長史公丙舍鄰也
強食弱肉今不覩爾我安用
羞雕蟲

半日行淺港中至亭午始入湖

水淺船低齊兩岸硬草蕭蕭撲窗亂上橫樹葉下
樹根轉舵愁逢汊港斷橫瀝東來水滿川船行至
此疑登天沙鷗見我忽飛去驚散琉璃千頃烟

繞柰山至辰山宿陸莆塘郡丞頑仙廬一夕

青山毫髮已可數到山尙隔十里餘水流寬緩船
少力但摩山脚行徐徐赤石障天不生樹竹萬千
个搖空虛山僧在山結屋居見竹生筍竹葉疎坐

臥皆竹看應厭我偶入眼還躊躇夕陽紫映山下
地舟人跣足收籊篠孤燈僅足禦雨溼引我夜叩
頑仙廬主人嗜古宦味薄歌舞可屏不舍書金題
玉躡礙揮手令我坐此同蠹魚萬卷欲食愧難化
明發揮汗驅籃輿

邊壽民畫蘆鴈

邊翁畫鴈人不同先有萬鴈儲心胸羊毛縛筆大
且鬆濡染迅疾驚神通其立其臥其飛翀偶畫一
二無不工身濃黑色嘴足紅純運墨汁苔牋融回
眸仍若珠玲瓏決吻顧脰形豪雄當時豈得屢年

豐農家秔稻田塍充飽餐不比鷺孤窮羽毛美滿
鳴嚙嚙洞庭之南湘水東盡日遊戲湖天空平沙
斷渚菰蘆叢白花如雪秋搖風肥身育卵可此中
勿陳小雅歌哀鴻

雨窗

睡足軒窗夢不成窗間蜂翅弄春聲晴天不向西
湖寺細雨輕風又滿城

一雨春宵又幾多湯湯檐瀑若傾河朝來積水風
吹盡草色依然展碧羅

逼人寒氣壓鮫綃浩淼波生蝨蟹潮銀杏底須叢
有葉高枝大幹響深宵
水蘩波頭盪遠空吹塵拂面正東風夭桃不管遊
人少欲放城西滿路紅

五月雨

五月雨何可無園中花開萬株一雨一夕開若紅
珊瑚一雨三日墮地鋪我欲見之生嗟吁

解一我有

旨酒日藏之室磊落三百瓶我將與客載以出柰
何一雨三日

解二

浦水之涘其鳥鴛鴦一雨三日愁

浦滂文采雖豔麗畏縮不得揚豈無鳳凰天半翔
不如鷓鴣鴻鴈日在旁

解三

蝸牛上我階蜿蜒食朝

茵食菌猶可胡乃公然上闌盾一雨三日大爲所
窘四解

夜發吳淞

江天雷雨陡然收放閘吳淞爭上流酒樂幾忘身
是客風涼始覺夜爲秋柝聲隱隱兵防壯螢火星
星草岸幽且剪短檠酣睡耳看山明日到蘇州

虎邱

虎邱僧寺水之隈二十年遊十二回沿岸樹經船
屢繫當壚人識客重來花香酷烈長廊出梵響深
沈上界催我是聖凡同趣者更看夜色到高臺

毘陵沽酒辭

木犀紅綻秋潮白萬斛樓船樹金戟錦帆風息晝
初晴停泊毘陵道邊驛毘陵夾道盡高樓羅綺丹
青午市稠闌楯麗譙懸鷺鼓堂皇廟祀建龍旂潭
潭公府絲垂柳岸繫輕舸君喚否雙鬟低倡越人
歌翠袖招搖出素手吳淞酒客性疎狂昵語愁聞
蘭麝香淺酌真珠向何處雲溪千古月含光圓缺
難齊千古月夜夜多情照仙闕別時容易見時愁
五兩偏反去倉卒露湛櫻桃芳滿枝樂府有鄭櫻桃春當
二十是佳時牧之不作揚州夢却到常州賦此詩

至丹陽

赤泥高岸似山根，路入丹陽水便渾。
橋背行人臨樹杪，天空飛鳥入城門。
東南客共千帆過，晉宋陵猶萬戶存。
晚向塔鈴聲下泊，碧蘆叢隔酒家村。

渡江用東坡出峽韻

鐵甕轉一灣，水勢忽焉曠。所懼遇大風，而風亦和暢。
境界江天佳，昔年此曾訪。金山踏級登，焦山攀木上。
圖畫各鬪奇，過眼猶未忘。片帆行其間，安坐觀秋漲。
浩汗從天來，豈可量斗盎。砢厓削作筍，積沙久成壙。
避此盤渦流，轉舵復西向。却看南岸山

聯屬如供帳，非十里五里皆千丈。萬丈際空兮出雲，沿波者嗜浪肉芝。天鼠飛形蛻化人，葬俱不及停船遊之攜竹杖。但啟蓬窗看沉醉，浮玉釀弔古詢舟師言詞多虛誑。碑側危莫支屋老破難狀繁華轉荒涼，所得誰勿喪多事。江南僧築祠塑佛像，柳陰綠盡頭正對黃天蕩。孫吳洎趙宋曾此爭伯王，天塹安在哉。晚烟起漁唱。

儀徵

江心掛席冒寒烟，却到儀徵欲曉天。
楊柳樓臺沽酒坐，隔江山色滿尊前。

場務開時客販鱸牙檣錦纜映蒼波襄陽兒女新
來泊燈火宵分一倍多

樹經古劫勢離奇葉綠春風一面吹聒聒神鴉喧
屋脊有人下馬問荒祠

招提一路幾人家翠竹紅闌望裏賒此去秦淮烟
月好囟囟不問廣陵花

夜登燕子磯

不辨觀音門口峯嵐光向夕照人濃潮生石岸明
漁火露下沙田叫野蠶官市風花三郡酒梵樓烟
月六朝鐘問誰好事能如我摸索深岩共倚筇

金陵雜咏

築城包數嶺嵐翠照宮牆古寺勳王府高林玉女

房自明祖建都六朝名勝剗削殆盡焉西歸惟杖履南渡又滄桑歲

歲金陵路風前草自芳

秦淮經不見或以祖龍名樓閣紅沿岸峯巒青隔
城橋通官路濶江入裏湖清斜月涼秋夜聞歌動
客情

綠波雙槳捷來問渡頭船輕幔張燈火勾闌設酒
筵粉香鷗鳥路笛韻桂花天訪古羣峯下歸途露
濕艖

舊曲埋香徑烟花記尙存鏡中雙頰暈畫裏十眉
痕虛艇維灘樹歸鴉落寺門蒼涼歌舞地共此酒
家村

報恩寺塔

郭南古塔上千霄規制巍然創勝朝辨位恰當琳
宇址嚮方渾借碧山椒往聞圖載仙靈最來訪人
忘道路遙戶啟乍聽鈴隱隱路窮已見影翹翹薛
蘿牆廣猶餘地鐘磬樓危祇及腰楹外松篁滋秀
潤門前宮殿鬱岿岿綢繆幾費民財構頽圯還經
劫火燒此日誇張憑野老昔年創造走官僚萬稜

瓦必俱頽式一片磚須別製窯次第編成名盡記
短長門合筆難描截金煉石虛明透瑟瑟綠鞋紅色
澤嬌衡鹿木材羞獻納工師刀斧謝刊雕蟠空鐵
索機懸軸絕頂觚稜斗指杓柱立巨鼇頭戴屹栴
翔雛鳳羽飛脩燈輝散漫烟凝夜色融和雨霽
朝闌面面圍紋似繡級層層起滑于瑤禪僧守護
宗疇嗣文士登臨侶可招展足步隨花苾蒭俯躬
形共佛焦僂深藏舍利將母在湧現優曇難再要
玉筍周遭皆嶺翠紫瀾環帶卽江潮誰迎車駕從
容進遂使亭臺顧盼焦皇覺龍潛方袞冕西山鶴

返又漁樵慈悲豈愜仁王願功德惟求母氏邀成祖
本碩妃所出靖難後知其詳乃作此塔爲功德世傳報道行者悞也覓得精藍過魏
拓築將瓌寶勝梁蕭名園水木奇爭出古里鶯花
豔未銷好是秣陵佳麗處法雲回首正飄飄

雨花臺

雲光說法臺上天雨曼陀羅華佛法本無如是而
人所見自差

放生池

清涼山脚放生池池上顏公昔有碑世界全從天
長養心情真共佛慈悲圍成綠浪二三畝開徧白

蓮千萬枝垂釣絕無人敢至唐時魚活到今時

遊清涼山

行天日赤塵作團人人道渴談梅酸眼前福地覓
可得蘭橈激水如飛湍繞郭曾爲十里遠林樾堆
鬢露雲巘清涼門口策杖行夾路松篁陰不斷梵
宮門殿紅檣開昔人曾此營樓臺繁華一夢五百
載我更避暑山中來日昃鳴蜩聲不歇催客登舟
與僧別晚風乍起宿鳥歸驚落芙蓉一堆雪

盪槩青溪

芰荷陵亂水花圓魚怕人看葉底穿此地江湖無

力到源源都是蔣山泉
各家作个水邊房花覆長堤竹出牆借問小姑何
事樂六時漁唱起滄浪

晤玉松用東坡陳季常旗亭見訪韻

蔣州千錢酒三斗我醉何能下堂走葶桃紅紫蓮
子綠酒戒昔持今不守長千里頭曉漏沈來遊倉
卒非君心時玉松服乍闕相
知有勸駕者乃至篋中有文秘如寶想
得朴實同銘箴畫船打槳波心過秦淮水清不著
唾約君共出水西門飽看青山對面坐

觀拾雨花臺石用仇池韻

土人尋石來共拔春草綠朝夕事爬羅捆載猶未
足鐵椎撞山尖竹畚剝山腹石去泥不堅坡陀日
以蹙始知山有寶不特苦樵牧于石頗示愛于山
母乃瀆倉皇取入笥得珉或置玉反謂五色者尙
在深岩伏洗剔乏清泉美惡終未卜一石稍具形
百夫相追逐持與佳石較仍當棄幽谷瓊玖爲人
爭礧砮非我欲拾此紫雲英偶得一紫色石文相
次不亂有白氣橫亘
其上形濯向清流曲攜歸蓄何器當買銅盆速
如竹篔

永濟寺觀石壁用畱題仙遊潭玉女洞韻

何年搜剔石根泥洩盡山靈山鬼啼海上莫誇方

丈鳥世間又覩武彝溪人驚玉乳將垂地僧秘烟
鬢不出閨我本愛山成癖者不虛到寺躡雲梯
百尺崖無一點泥倒懸藤樹聽蟬啼佛何曾識道
旁騎人不敢看檻下溪秋日帆檣浮澤國晚天鐘
磬起仙閨未甘空手別茲去待作詩成始下梯
坐船首望南岸諸峯用江上看山韻
一山好亦贖吾意况乎峯嶺俱成羣風帆安穩去
自速看山反若向後奔山到江南南岸繞舟行其
間殊渺渺飛翔天際樂更多鳥不我知我知鳥

歸棹由攝山沿江至京口用與葉淳老諸人

同相視新河韻

連岡若楯峯若戟青山遠與眼光射忽然近山亦

可行誰爲長江分一翼

金陵水程舊皆由黃天蕩近日以新河告成乃沿攝

山至鎮江較前爲穩

弄舟傍岸岸卽山臥見江南萬山碧

間豈無好事者來此看山自江北當前不顧竟過
之山不拒人人自畫築亭居山興固佳支筇上山
計亦得誰乎愛身勝愛山懼敝尻輪恐傷肋能溫
下臍雖有酒可去前齒則無屐蓬窗夢覺山未盡
獨坐依依攬夜色遙憐收港是丹徒高岸泥乾十
丈赤

歸晤北居丈談陶谷隱仙菴寶光寺諸勝恨

未及遊用懷西湖韻

看山如入道到者爲聖賢十苟得八九一二仍不
全疑彼最妙者正我所棄捐翁頃病肝病畫舸遲
江天我爲秣陵遊顧盼多少年登山尋山景半出
俗口傳市街物俱賤梵宇飾必鮮奇勝亦何有怪
歎立晚烟可憾六朝麗咫尺藏其妍意味從此減
聽雨紅樓眠秦淮醉未幾歸計相烹煎遊固不克
盡豈謂遊亦便卉雜具真態花香悟淨緣陶谷酒家多雞
冠老少年隱仙他日約同造吾願攜酒錢
寶光並有古桂

需人患瘡索子咏史詩十首謂誦之可以愈
其病予慚不敢出迨遊秣陵歸聞其病已
痊乃作此奉寄

昔人誦杜句瘡鬼畏可知今君病瘡索我詩嗟嗟
我詩何能爲或者奇醜過於鬼鬼亦驚駭則避之
髯奴遣來索素紙慚汗濕衣寫復止秋風往看秣
陵山歸棹聞君病良已瘡鬼牀頭旣鼠逸我詩于
時挺然出要知弗能爲君醫但堪養疴解兩頤

乞寧齋畫水木清華圖照

畫水畫木至易耳水木氣帶清華難請君畫水更

畫木其氣朝夕浮烟巒山到江南真大好木極蘿
蔥水迴抱登臨全仗腰脚輕貌我容顏及未老我
持圖去披征衣故人勿笑初心違他日山中賦招
隱便向白雲多處歸

君山

君山峙城西北形巉巖有路甚直直至山之巖絕
頂縹緲只兩殿一閣當空岑寂乏千松萬杉階級
平滑勿用竹筇護藤蘿枯折安事霜鎌芟欲眼醒
豁聳身上岡阜恐足躑躅垂手握衣衫泥土粘墮
亦復有沙礫峯巒磨洗間或如削劖蟠螭屈尾鑄

鼎庭際設怒虬昂首琢石臺端嵌巍然煥然疊桷
接夜宿大書特書題額橫秋冕鎖莖鍵門棖已紅
漆暗屋漏濕佛面使黃金賦蛻尙脫檻蟲行斷不
于泥空濺地燕語杳呢喃架欹筍簾鼉皮鼓消響
壁懸塵垢貝葉經多函觀心丈室妙心乃益妙縱
目千里凡目亦不凡忽飛雁于暮天烟外過旋落
日在遠浦舟邊銜來船形小漸比去船大江水味
淡直接海水鹹浮波冰響鐘鏞與笙磬退潮岸積
螺蚌與蛤蜊縫破衣女呵手凍拈綫挑野菜僧僂
背低荷鏡春焰焰生綠返草葉半冷微微退香發

梅花咸如其聯句以至却須伴但當沽酒而飲何
用監遊興儼同謝安攜伎逸歸心非比張翰思鱸
饒客窗久住此時便除歲家書欲寄疇處可投緘
過從知交亦差消遣耳不然卽此山下揚蒲帆

江陰寓舍元旦次硯香韻

未得言歸賀歲新淹留却與友朋親河橋舴艋虛
今夕客舍屠蘇共此晨曉日光中霜作絮梅花香
裏草成茵聯吟最好春初到莫道鄉醪不醉人

聞遠峯移居

卜居聞說勝槐塘齊女門前花木香野濶屋浮雲

藹藹岸低橋亞水茫茫雄辭偶吐奇爭賞春酒新
筍快共嘗我欲日需舟一葉訪君常到讀書堂

觀捕蜺

白蜺得春氣湖底生萬千其殼薄而脆其狀小且
圓吞水復吐水各各含微鮮岸側摸蜺人賣蜺慣
趁錢待蜺欲上時共掉圈棚船斫青竹兩個繫網
沈諸淵蜺無眼耳鼻遇物任簌顛如掃塵入箕頃
刻倒滿前嗟蜺尙癡臥湯鑊已烹煎熱酷透罅隙
香腥露嬌妍棄殼山阜比積肉糠粃然粥蜺飯亦
蜺視之無垂涎苟熬牂炮豕居彼此必捐小鮮何

可嗜捕者乃不悛誰當斷汝唇給以穉耜田利視
捕蜺厚此業當舍旃

次子乘青蓮菴綠萼梅韻

春藏白花綠蕊中露華昨夜催梅龍五日發香五
日放苔蘚不得重重封北向枝遲一二日半樹瑟
瑟穿當空紙窗怪底染塵碧疎影正照伽藍宮連
宵密雨將變色珠邱珠散求奚從天公却亦此梅
愛不施塵霧不作風養花太足花信晚微吐萼出
修梅容我看梅花多絳蒂青裙縞袂始此逢尤喜
托根在平地飽看不用登山筇年來襍被水上閣

松篁一徑招提通拏舟那復到鄧尉仍有夢與羅
浮同參橫月落翠羽逝酒壚何處尋黃公

范箴畫牛

厭雨那得晴鳩呼聲聲布穀催農夫隴頭土溼鬆
且腴耕田兩區當一區侵曉出門暮便返歸路却
指林之隅老牛旣老能識途童臥其背安用驅子
牛隨後叫母急牛強回顧行脚躡桃花水漲一牛
懼壯趾灑灑拖泥污童將抵家頭漸仰牛欲登岸
口更吁牛腹淋漓童足濕開門應有餉婦扶今夜
疎林燈火下童臥聞牛齧青芻

聽肩峯談虎

居庸關頭霜月皎虎母爬沙出深草西風滿天吼
一聲狐兔奔馳客驚倒胡生自言曾遇虎虎忽前
行未生觀惜不同生沙磧過助生仗劍追於菟

遠峯家海棠盛開同玉松往觀

林家海棠石坡裏百年物乃大如此想見未作墻
遮時紅照禾田路人指却誰搆屋對烟巒花開花
落無人看林君來居花有主日日沽酒還凭欄我
謂林君天愛汝吹花以風濯花雨春光九十今百
二今年閏二月紛纈朱絲挂多許江城寒食花娥娥村

深何人拄杖過婦開家廚兒秉燭君醉花下當高
歌花影沉杯滿春酒何忍離花出門走更招我與
玉松來此花兼爲二人有

祥源觀書所見

毘陵仙觀揖星辰白水紅桃福地春從我三山騎
鶴去煉丹爐畔恐無人

遇雨

桃李陰濃午泊船沙鷗聚浴草芊緜一宵雷雨江
潮漲鐵甕城西白到天

守風

岸柳搖風烟霧間小船閒閣水潺潺不如取道金
雞嶺數騎看花過攝山

四松菴

菴以松名松不見老僧補種竹千竿山遮屋角春
常濕水逼階除午亦寒佛坐或都無矮榻禽聲時
一到危闌避他士女盈城豔啜茗來追清淨歡
至隨園因主人袁簡齋太史往粵不得盡遊
樓底鶯花幾畝寬脫衣揮扇小盤桓且畱一半青
山在他日憑闌高處看

寶光寺

路貫城南山頂青林巒又作旋螺形何年表墓皆
爲碣昔日臨流似有亭地僻鳥多巢古桂徑偏犬
獨守重扃野僧錯認司宮吏殿脚來迎輟誦經

白門新句次徐朗齋韻

尋芳曾買木蘭舟十里珠簾上玉鉤碧樹紅桃遮
掩處娥娥人倚水邊樓

薄醉秦淮賦冶春六朝金粉畫中身吉祥歌調新
翻得擬勸尊前得意人

憶別家山路一千豪吟旗鼓逞韶年東南孔雀徘徊
望歸信還遲月下弦

青青楊柳發新枝攀折臨波正及時獨有迦陵詞
賦客櫻桃還咏定情詩
燒殘鳳蠟夜憑闌小宋能禁半臂寒桃葉桃根春
色好東風一例比花看
禊飲秦淮畫閣虛懷人醉後不成書閒身又作雲
間鶴敢說才華鸞鳳如
老秃毛錐染墨痕蒲帆歸指曉煙昏生平尙欠尊
鱸債綠樹村中更閉門

龍潭

龍潭龍去烟雲散潭上垂楊綠蘸波峯瞰樓臺皆
削筍路藏竹樹似盤螺漁家自得成羣樂芋種相
傳徑尺多我欲買田京口住泛舟時可一經過

丹陽道上

蒲帆獵獵扇輕風船放斜陽映水紅牛浴沙灘蘋
葉散人居土窟樹根空峯頭畧起何曾怪橋脊平
鋪不類虹隔隴浮圖看未見却聞鈴語起天中
七夕招吳松崖張桐村唐愛堂山園小集
天上雙星此夕明開樽池館晚涼生詩能入律無
今古坐必論年卽弟兄燕羽差池秋欲去薇花淺
淡冷猶榮穿林新月橫斜易擬話更闌蕪短檠

次韻寧齋照鏡見白髮示內作

把髮何曾雪色盈却從黑裏幾莖生王珣自具飛騰相潘岳虛聞歎息聲種種如君元未老青青似我竟無成曉妝趁手須勤鑷莫使高堂意暗驚

家厨將烹魚爲饌一鯽獨有生意畜以盂水俄頃遂活乃放之門前小溪中

死活須臾判寧忘舉手勞僞烹休使校真趣要觀濠鼎俎吾能省刀砧爾幸逃不隨鱸菟物今夕薦溪毛

朗齋以蘭蕙詩見示因次其韻

金屋春深開滿櫳烟光月影護重重松筠合映窗前綠桃李休爭陌上紅已日信來宜小雨午天香足愛微風當筵任有評花手兩兩瑤花格自同何來蜂蝶繞花房裊娜都因兒女香閨婦善懷原可念仙姝下嫁亦何妨同心欵洽鸞膠合競體續紛麝馥藏佩服阿誰親采得吳山越水有餘芳

佛頂珠次三英韻

西方聖人喜施捨肢體自視不甚珍忽然解悟撒手去一任火化隨飛塵金蓮朶朶烈焰起中見瓔珞枝柯勻袈裟色壤香象走功德水灑神龍馴沙

彌埽地親拾得收藏玉匣流傳真峻嶒朽骨觀佛
性經古今劫常如新龕封膠漆題識固塏建瓌寶
光華臻老僧東渡無一物禪林因果誰共論切磋
頂骨百有八穿以冰綫堆層雲髓枯得淨凡業障
血漬善殺諸邪神摩挲日夕益堅滑顛顛旋轉飛
金輪乃知法相具種種隨處皆見丈六身功修倘
使少証據兒孫何用空燒焚請懸此珠師子座伴
讀梵唄常含春

題惜花美人卷

花前曉立不禁寒只恐東風信易殘儂慣惜花還

自惜及時顏色一般看

題華硯農筍香圖照

滄江積雪白多許枯枝能作鳳凰語雷鞭石裂驚
火飛出地新牙太如杵籜籠深裏玉骨鮮未著春
風同處女芬芳得雨滿林生豈待僧雛脯中煮君
今出山靡定所擬拜閒官坐庠序碧筠到處請移
栽隔歲句芒美堪茹脫縹緲肪泛清泉遊客當來
飯雞黍不然畱作千尺竿香拂衣襟亦消暑

喜晤張子白王笙齋

張騫漢通侯王珉晉小令各各才絕人林谷共情

性我醉五茸城初問二子姓明月樓臺間飲酒迭
爲政坐久白露零寒意變秋孟燈炮角鳴鳴星河
指斜映歸臥桂花叢不寐發新咏君句倘可仙我
眼自如鏡

夜泊西余子白訪余不得遂沿岸大呼予名
亟起赴其船飲至大醉用東坡百步洪韻
二更新月沈蒼波小船夜臥匾若梭泊船沿岸卽
山脚船背響與峻嶒磨友人誰來張子白大呼我
名立高坡黃雞紫蟹畫橋畔想已傾倒千卷荷推
篷相見各濃笑失足幸水非盤渦船頭拉我更登

岸不顧月落天無河踉蹌一路踏草露秋風吹袂
飄香羅張船停泊亦咫尺呼酒更進黃金駝二三
客皆未識面衣冠委委復蛇蛇觀我脫畧亦我愛
權呼喧于鳥出窠倘我買田住同巷日有此樂當
如何醒者咸曰固大好請臥且免鄰船呵

羅春淵石鼓山莊新居

君厭塵市囂入林氣何勇買得泖河田四山盡環
拱老屋八九間雲霞宿斗棋庭栽綠竹牙池畜烏
濩種家具初攜將卷帙汗牛重鄰人怪少見來觀
定簇擁豈識君才奇下筆思泉涌樂府秦黃間吟

對峯巒聳羨君得此樂卜居思接踵鼎鼎名利場
塵事苦煩冗今始登君堂高咏大觴捧扶醉別君
去夢落江波洶

贈別陳華萃

楊柳樓臺月色多宵分扶醉聽吳歌蓬萊橋下秋
潮水獨送人歸奈爾何

對酒

長楊奏賦罷歸復掩衡門酒食人心饜琴書我道
存買田虛水上種竹尙籬根一夢遽然覺空聞鼠
雀喧

少無干世志何事出山間丙舍三椽乏丁錢六字
艱奕輸憎錯著童飽觀歡顏俗累誰當了林泉往
復還

筆墨生涯小扁舟幾歲年奉觴無薄酒倒鼎悟凡
鉛居傲春江閣人招桂樹篇相思風雨裏辛苦寄
紅牋

浪跡鶯花國中情頗自豪傭書羞醉飽訐吏鄙錢
刀愁以昏昏解名因鹿鹿逃逢人難說與此意問
醇醪

紀旱

旱魃能爲虐田禾葉葉焦沾濡虛夜雨灌溉仗秋
潮米粒從圓綻農人未富饒半完租稅去恐爾腹
仍枵

江北荒災亟民俱向此奔沿街擔子女乞食度朝
昏金帛誰相貺藜鹽不厭吞吾鄉安堵在天地有
殊恩

村農偏乏米乞糴入城多社穀藏安用商船到屢
訛民惟思慰藉吏欲善調和巴蜀新通市休吟黃
竹歌

對菊次張蒙川山長韻

藝菊華堂百種陳重陽天氣作花新燈前塲管皆
騷賦籬下傾杯亦晉人老圃自饒清氣味西風真
有瘦精神池荷岩桂消殘後尙爲疎葩倚檻頻

對菊雜咏十首之六次起山韻

霜花弄色晚逾芳水次山根幾許黃碎地千頭蠶
翅亂懸空一丈雀翎長燈搖靜夜沈香火人曳寒
天金縷裳錦荔碧蟬相映處繽紛光采鬥重陽
光映花間看切親誰分隱見去來因只教水墨同
真本豈定黃金是法身或整或斜燈意態忽濃忽
淡月精神西風應借天工巧遮掩山家壁立貧

底須修合比椒蘊花際聞來自作香酒甕漉時情
旖旎詩脾沁處氣清涼風飄直過前溪水雨洗還
生舊草堂桂萼已殘梅未吐年年芳信不能忘香
瓣吐深黃併作堆細觀疑倩巧工裁御袍絲縷初
抽繭瑞鵠翎毛乍轉胎層疊流蘇風際散正齊圓
織月中開靈均空復悲搖落那許星星點綠苔英
冰凝吳苑衆芳乾瘦葉伶俜傍曲闌猶喜綠餘三
徑在須知秋未十分殘抹塗熱解楊生肘洗澡腥
除鱗佐餐分付園丁刪莫盡仲冬畱映晚花丹葉
籬落秋殘一望賒無多嫩葉抱新芽尋芳舊是先

生癖乞種頻過老圃家細識陰晴方可藝已經霜
雪不須遮吾能觀此知名品去取何庸待放花苗

雪浪石歌用昌黎山石韻和起山

石紋如畫水要類孫知微長風吹浪浪堆雪倒捲
千頃橫空飛當時產石材頗鉅驅車捆載牛苦肥
或求佳者置懷袖勢必卷縮而今稀端州太守有
奇癖甲乙諸品慰渴饑謂張蒙川先生工人錐鑿用盡缺
得寶來欸黃金扉光華皎潔照眉宇恍疑月出開
天霏摩挲茵席置硯北峯巒纔及指一圍退休日
與石爲友不肯棄擲寧典衣贈君君卽作詩報敏

捷若馬初脫鞵又能摹寫雪浪入毫髮此石舍君
將安歸

客窗夜坐

蠟梅香裏峭寒初指冷慵開堆案書喜得紙窗風
不透一鎧花蕊結徐徐

裕伯題橋望月

海螺初起月如盤撲簌霜花上面寒不是客遊乘
薄醉夜深誰倚碧闌干

五陵少年行

昨日買斗酒今日擊肥豨醉中起謂諸少年仇官

右扶風今當柰何許少年再拜避席言人貴相知
心何用相飲食囊中探三丸報君出作賊以手探
三丸赤丸不可得白丸不可得欲殺武吏武吏反
殺我文吏大歡樂身擁兩姬假寐坐賊來懼呼令
史令史撲滅堂上火火急報上官上官來入牙署
詢問令史乃知賊殺人黃金與珠玉各各不將去
上官謂縣令爾曹急捕賊若屬來小者斬大者砒
若屬不來乃爾捕不力朝捕若屬來奏爾夕拜大
官職

永定寺看神燈詩

水田月落村村黑只隔溪橋行不得居人繞岸待
神燈忽見林端氣光赤須臾一燈向上行數燈搖
曳隨之生徐徐拔地起天半一燈倒退來相迎聚
散紛紜弄狡獪才作團瓢變方罨旁人所覩向我
述多少懸殊吁可怪雲旌風馬事有無今乃目擊
非模糊此鄉在昔寇盜窟戰沒有鬼雄千夫白刃
交揮首飛墮毅魄何甘化燐火炯如列炬上衝霄
陰雨吹來光不韡埋骨難求土一堆好憑燈焰酌
新醅荒祠血食春無主呼嘯空原去復回

寶書堂詩鈔卷三

上海褚華文洲著

眉洲歸閩用東坡送運判朱朝奉入蜀韻

春風開梅花夜夜弄新月醉倒月明中衣袖香未

滅我醉方爛漫君何別我歸樓臺壕水上話別牽

君衣

時張瞻園丈招飲于東臯草堂

衆賓起送君弦月挂屋側後

夜一輪圓應照兩地隔我留滬瀆壘君去金閨亭

渡江抵仙霞山山列翠屏聞君骨力弱不善馳鞍

馬買得如葉舟爭路羣峯下萬壑響疾雷詩思駭

不生登岸急追想一一爲品評所惜灘水駛奔騰

無寧日不然往共遊聯句劄崖石

王夢樓太史觀子和東坡汁字韻詩因寫素
食歌長卷見貽作此報謝卽次其韻

受殺生戒孰予同丹陽老宿文章公遨遊宦海忽
證悟每爲衆物心蟲蟲嗟予好生本天性出錢買
放愁力窮祇以大聲代訴理敢謂說法振聵聾入
道無分凡與聖摸索人天自尋徑鈍根居士福幾
何方丈瓊筵屏館飭讀書固爲孔氏徒用釋叅儒
理亦正勿妄釣弋遠庖厨奚翅優婆惜生命十年
風雨荒城舍蔬食家居消日夜楞迦斷肉因果存

于此還求轉語下食單進處珍品多誰放屠刀痛
持戒值公來此寓山園坐看梅花客不謝燈前覩
子和蘇篇水乳融融與之化長歌寫贈筆墨精裊
裘走謁茶初烹極言無生太上旨意味淳古疑劍
羹夜光含時意珠朗春波活處心源清舌端宛轉
繞千偈龍騰象走莫可撓吾聞廉使欣公邀侯鯖
阮臞開新庖明燈照樹曙星皎鷓雞絃脆嶰竹豪
沈香爇火耀閭里隔墻不受鄰人警豈知木天染
翰客寂同枯衲手自搖積累黃金高北斗哀樂關
頭能細剖鱗生鎖語有一得謂可深談弗嫌醜快

經知識指點餘如煉靈砂獲丹母朝來畫舫惜欲
西話別旋歌折楊柳

梅花間有六出者次張蒙川先生韻

嶺上東風力量奢梅英開與雪爭華鱗飛六六排
初整玉破三三落半斜畧大幾分因月閨獨多些
子豈春差朝來想得吟香客數遍彫闌異樣花

救火行

元宵絲竹聲玲瓏春燈影裏人作叢月斜有客乘
醉出不知耳畔生融風市懸烟火趁燈鬧金錢爭
買誇精工硫黃硝石性殊燥何得以火投其中火

投藥中藥卽火飛起千道如長虹穿墉已透復繞
棟儼持巨斧開山通須臾火勢徧閭里騰光迴上
天爲紅呼聲動地哭聲沸鳴鉦者誰嫗與翁官軍
撲救競奔走水龍飛出當其衝一龍昂首忽噴水
兩龍背面來相攻火光號號水灑灑驅之使西還
向東水營大帥心何雄一躍登屋離花驄揮戈著
屋屋傾倒但見火滅烟朦朧焦頭爛額是誰子今
夕投宿如猿窮

豆麥

豆熟筴乃白麥熟穗必黃青青田中苗豈可充饑

卷三
腸側聞秣陵郡亢旱田俱荒富戶窖稻黍窮民寶
糝糠掘根及衆草剥皮到枯楊此時豆與麥纔得
數寸長欲延旦夕命共礪鎌如霜又割入脯煮咀
嚼差甘香昔食豆麥實纍纍盈筐箱今食豆麥葉
曾無什一償利病豈弗諳萬全策難商元知首夏
祭薦新安所嘗眼前暫紓死後慮請暫忘

喜雨

海上人家劇苦辛杪冬不雨到新春數莖野菜難
遮地一勺清泉亦乞鄰擾擾軒窗明白日茫茫几
榻捲飛塵密雲偶作爲霖態勞我衡茅悵望頻

喜見天空烟霧橫宵來風雨滿江城方生簾外蕭
疎影漸作簷間滴瀝聲鈿匣分牋紅熨貼玉甌樹
蕙碧滋榮連旬得慰農人願滑塌何妨礙出行
麥苗過雨長蒙茸曠望郊原綠萬重潤澤已教環
滬瀆桔槔何用灌吳淞會收玉粒登場曬待簸珠
胎入臼春桑柘影濃村社近歌成擊壤聽三農
岱宗左側大湖邊早魃爲災已二年燥裂高原難
覓草淺淤澗港不通船工商食缺饑頻賑山澤田
蕪賦必蠲安得膏霖吹徧野民生同此樂安全
牡丹未花同陸羹厓飲酒其下口占一絕

卷三
藥珠小閣住僧伽誦罷楞嚴便種花穀雨未過春
寂寂翦燈先看牡丹芽

藥珠閣卽事用東坡南縣尉水亭韻

客借讀書處僧稱選佛場但無塵作障可以睡爲
鄉門僻纔通徑樓低僅若堂水雞喧梵語木芍弄
唐妝蕢酒逢春晚哦詩愛日長招尋攜蠟屐諧笑
接繩牀豪氣銀河上癡情錦瑟旁醉來都起舞歆
側似風檣

觀漁

鄰家有清池畜魚不可數養飼身旣肥忽焉思盡
取細綸屏垂鈎密網謝施罟役夫裸股下戽水錮
如釜大魚已橫陳小魚猶跳舞捉至一罾中魚族
共攢聚聊奏新婦能將飽老饕肚朝食晚卽饑區
區亦何補曷若生畜之游泳俛堪觀領畧濠梁趣
坐消日亭午

縱魚

有客竭澤漁贈我魚十尾鱗活春水白腦滿新月
肫貫腮強跳躍我見意殊悱泣鮒誠渺小化龍亦
英偉剖腹屠肝腸魚惡非蛇虺相度城壕流一曲
綠葭葦呼童往縱之童意亦竊躑嗟此婦孺情實

足証神鬼生殺皆有機毋以爲物非請棄庖丁刀
聽我言齏齏

邑人好作紙鷓子如瓦形者大必尋丈每放
時必用數人牽挽戲咏之以志土風

誰爲紙鷓仰瓦同實無兩翼能翻空濶將丈許長
更倍製造麤厚堅難攻其端繫縛雙股索村民競
昇來田中齊聲大喊忽放手陡然躍起高摩穹羣
驚搖曳發牛吼焉辨箏韻音諧宮是時東風氣正
怒烟沙亂捲天蒙朧自矜鼓臂勁于鐵力與風鬥
爭英雄掀冠裸體負索走風頭漸緊力弗充幾回

倒退足離地懼脫手去心忡忡可憐氣喘汗流雨
操縱那得由人功吁嗟乎妻孥醜酒久相待遄歸
恐及斜陽紅

觀法華牡丹

鹿韭花開日遙聞院落香千枝春弄影五色曉含
光溜雨圍文石遮風界粉牆爲憐芳意在時共客
傾觴

張梧軒家
香化草堂

老翁花裏活眠食盡天香覓種心成癖分株眼有
光春生三堵室紅上一稜墻何以酬閒暇憑欄獨

舉觴

吳氏
屋

花好當庭種軒窗三月香淡真翻雪浪艷亦燦霞
光飛塹寧沾袖遊蜂或過墻清平能自譜侑飲莫

論觴

王氏
書館

人去花仍發傷情入室香故枝偏墮美新蕊尙生

光且理潛夫業休誇宋玉墻

淡香以情死今遺孤
方長宜戒其專事誦

讀

也臨風重太息四座爲停觴

亡友王淡
香別業

送陸耳山大廷尉服闋還朝四首

海內儒林首共翹

虞廷徵角喜聞韶屢持玉尺

量多士常直

金鑿冠從僚威重已懸廷尉綬清

華擬著侍中貂讀書自有經綸在待和鹽梅入鼎

調

釋之論讞

林殿階陳定國平反案牘新照物無私

光比鑑活人有脚氣同春聲華籍甚居卿貳官職

依然耐食貧只喜石渠親見過座間亥豕許諮詢

憶從總角識公初江左才名錦繡如榜自禮闈開

淡墨賦隨

行幄獻華琚昔遊庭院曾陪飲今住林泉又比廬

桃李新陰寧足齒尙令小草得吹噓

家居兩度閱星霜此日吳淞趣束裝采鷁應多津

吏迓錦衣還共列仙行含飴樂自供慈母補衰心

惟報 惟報 惟報 惟報 惟報 惟報 惟報 惟報 惟報 惟報
聖皇想得 聖皇想得 聖皇想得 聖皇想得 聖皇想得 聖皇想得 聖皇想得 聖皇想得 聖皇想得 聖皇想得
天顏瞻 天顏瞻 天顏瞻 天顏瞻 天顏瞻 天顏瞻 天顏瞻 天顏瞻 天顏瞻 天顏瞻
石觀音院 石觀音院 石觀音院 石觀音院 石觀音院 石觀音院 石觀音院 石觀音院 石觀音院 石觀音院

俗工琢石石骨靈聖心一片含空青門開江水坐
相對時見野鳥飛沙汀大千苦樂觀平等何云拜
佛佛心肯老僧妄言人妄拜日日橋邊繫遊艇

食筍 食筍 食筍 食筍 食筍 食筍 食筍 食筍 食筍 食筍
秋風吹竹林萌芽細么麼條條玉甲長節節斑皮
裏尋覓沙路間斲取載輕舸雜陳瓜菜間索售價

頗夥鹽豉共買將質脆隨刃墮浸以清澗泉燒以
鐵鍍火下酒相對飲莫笑兩頤朶譬之春食菘其
味亦差可

子白招同小乘笙齋鳳山水閣小集

秦淮吟社昔相招修禊流杯未寂寥正值秋天初
過雨又逢我輩此停橈夜涼花底黃羅扇月朗樓
頭白玉簫何處畱人沈醉好澄波一鑑柳千條

鷲峯寺

前朝此地鶯花海十四樓東佛寄居僧定覺來紅
粉盡風澗月影問何如

高座寺

門蔭娑羅碧葉叢談經高座亦門風可憐未出岩
前定劫火橫燒樹腹空

破殿無僧晝不開應尊五百坐迴環鳥啼花落何
人見絕似西天大雪山

青溪柵晉尙書卞忠貞戰處也上海人褚華

弔而哀之爲賦青溪曲

歷陽馬肥怒齟芻一夕捲甲軍長驅江頭烽火寂
不舉元戎安在烏畢逋手無斧柯奈賊何仰天自
誓七尺軀青溪有柵勢亦孤賊攻以火柵焦枯闔

門巷戰死白刃死時猶聞振臂呼青溪柵水瀾漫
石頭城山歷亂前有卞壺後袁粲

沿江十八洞

路出永濟寺左顧斷溪澗竹樹蒙茸間一線露石
棧是時秋雨下泥淖欲沒骭同遊思退步勝具我
自辦得徑奮勇往境奇匪我謾高峻接飛鳥逼仄
礙奔豨陡壁欹若傾危崖削如錐有洞數十八各
各巧穿縮一洞懸在空一洞細無間一洞窄莫登
一洞深難覘餘洞僚佐比從之執羔雁石竇漏風
聲石乳掛珠串草細牛毛茸花香鶴頂綻凡此諸

洞奇所歷多變幻來當午日熏歸及晚霞縵茲行
苟畏縮安得畱睇盼乃知天下事僅爲懦者難

題九里松圖

武林山水窟十里一佛寺行人來訪古恨無憩息
地誰爲好事者夾道樹蒼翠風動香亦生陰濃涼
自至試問紅塵中此境得豈易我擬西泠遊松聲
入夢寐坐石發新吟臨流漱殘醉所願久未諧披
圖起幽思遙羨圖中人烟霞共嬉戲

寄題陳氏天竹

聞說南天竹實多海濱僧舍較如何
昔遊明心寺見天竹甚多

非同枸杞懸崖壁絕類冬青照澗阿
碼碯千堆盤裏碎珊瑚七尺網中羅叢叢風雪紅
深處倚檻應成得寶歌

石湖女兒刺繡歌次小乘韻

石湖女兒飯不足羣聚簷頭肖猴沐色絲妃就運
鍼神獸走禽飛景繁縟自矜天巧世無雙不塗粉
白施鉛黃當時早隸菊部籍豈其學舞無微長日
日傭工坐偏久松竹吹風冷纖手賣得金錢不上
身紫鳳天吳亦何有食挑苦菜爨勞薪辛苦還拈
采線紉可憐畫閣珠窗裏多少高眠倦繡人

銅井

屋掛蒼藤石掛泉樹含殘雪月含烟別來銅井銅坑畔輸與漁郎夜泊船

哀樂

絕壑危崖恨獨行酒旗歌扇笑相迎世間哀樂知何物辜負猖狂阮步兵

吹螺

吹螺聲裏斗沈河鎖鐵星橋事若何海鳥尙餘妖鱷在却煩飛將挽金戈

題曹淡持飛梁絕壑圖小照

空山怪樹無人樵根盤礪石枝干霄綠陰彌布望不極風吹時作聲蕭蕭何年雷擊蒼厓裂滾水排沙地成穴水流倒從樹底來迸出奔騰千道雪蹇衣欲渡路忽窮兩岸借樹爲橋通樹身橫臥平更澗不須斧鑿煩鬼工誰捫蘿葛索仙境虹背衣單白雲冷眼光搖蕩潺湲中中有吟詩道人影

宿春淵石鼓山莊之明日復汎舟遊千山因

訪瞿霞扉古陶鐙廬不值畱致此首

九峯峯以石鼓名故人來遊聞鼓聲摩挲翠碧愛不置卜居峯前屋數楹相逢郡衙角射處邀子看

山同出城小軒一榻醉桃李曉來舟更沿山行衝
烟放棹春流活竹樹前頭更空濶仙壇喫得道人
茶歸路依稀見新月松陽數子皆雋才叩門不值
空徘徊詰朝訪我我遲爾小艇赤闌橋畔來

余山雜詩

西余山市碧山根石岸參差落漲痕怪底春遊人
起早泊船都傍酒家門

繞檻花光映水光松枝低綴小迴廊及時風味山
中筍作脯調羹喚客嘗

一徑幽篁千萬竿山家分界種檀欒都因欲擅蘭

花號競買沙田靠石壇
斟酌穠芬晝掩關老僧清福勝人間燒菱炒豆風
檐下怪聽當壚說本山

磴引松杉夾道青半山古屋小于亭跣趺有佛拈
花笑飽看烟嵐戶不扃

日欲沈西塔影長兩山相對鬱蒼蒼遊人已散騎
龍堰墮舄遺簪草亦香

漸看亭榭罨林霏簾幙低垂鳥倦飛月落堤邊人
語靜滿湖燈火放船歸

千山餐霞館

篋裏銀光數紙書墨花鮮比寫來初道人陳某出所藏名人手蹟甚多樓臺似乞天神護偷過前朝兵燹餘

尚書宋苗裔茗雪吾故土卜居滄海濱甲第望衡宇明季倭寇至妖氛滿黃浦樓臺火劫餘軒楹化平圃開府安簡樸結構庇風雨曾元日以繁闢垣自爲戶雞犬喧田園奴僕遍廊廡事變百年間各各求買主

吾祖重先業售宅畱一隅畫檐間榆棗碧水分菱菰猶憶總角時開軒闢園蕪是時古柏叢三芝忽

華敷休美衆指集稱說毋乃諛故交旣零落近戚亦負逋鹿鹿數年來奔走爲饑驅可歎竹與石又爲他人娛

落花不上樹覆水難入缶物已久棄置雖美非我有豈知越賈人算緡乃我負債畢再剖券故里復回首登我東堂階開我北窗牖樹木仍青蔥藤花略枯朽服勤來老僕話舊招鄰叟得失固偶然茲事欲誰咎

空宅旣可住始攜家具來階級滋碧蘚窗櫺冒飛埃室乏歌舞貯榻僅圖書堆棟宇太低亞燕雀亦

我猜我欲舍此去蓬闥無樓臺我欲卽此住門徑
沒蒿萊土宜蠓房墜木求豫章材斯意久不決中
庭立徘徊

吾猶愛吾廬鳩工畧營造老圃畚積土閒庭鋤蔓
草墻壁數塗墍房幃勤灑掃有屋八九椽亦容吟
膝抱立屏不嫌隘布席但求燥遷徙徒自勞息機
悔不早人多向成規已慚趙文禱瑣尾憂可釋此
境貧亦好

題錢妙香深林月照圖小影

唐鼓打花場燕筑擊酒市琴香叶雅頌只宜山與

水夫君性好琴林下久栖止抱器入叢篁泠泠奏
方始濃綠一徑深俗人不來此月乃太古客箏笛
未染耳惠然落清影光明照十指暝烟忽吹散境
界靜可喜御風正若仙挹露惜如泚後夜請復彈
月更爲君起

子白招同翁石瓠丈小飲論詩至夜半

舟行兩日一日風大浪掀帆葉飛舞客居五日三
日雨倒射軒窗如打鼓愁看叢菊久閉門今朝睡
覺驚朝暎吟情不得快傾吐枯坐乃令神欲昏賴
誰招尋石瓠叟子白郡樓開大尊我雖飲酒苦病

腹到口醍醐失芳馥論詩未醉興固豪見解力破
明人俗渾灑固必祖杜韓清折烏能廢坡谷質之
二君咸曰然平允足矯何李偏歸家請共作詩紀
毋謂前說持難堅

錢問山以自題秦淮放棹圖見示卽次其韻
鶯花境界逐時更蘊藉年年過客情何事酒痕猶
未褪討秋重到秣陵城

飛觴綺戶久寥寥客邸還成獨酌謠一種離愁消
又起花晨絃子雨天簫

岸口垂楊碧欲銷曉雲不散塔鈴搖畫圖抵讀烟

花記人在紅闌長板橋

糧艘出海紀事五首

蠻人殊渺小假息海中土負堯封僻形藏禹鼎
姦蟲沙悲致命狽虎喜當關共盼

王師下殲除指顧間

幕府需兵食東南歲有收太倉徵宿糈巨舶運中
流兩岸宵鳴柝千人曉唱籌事成民不擾令牧費

謀猷

三老心情慰朝來片紙傳常餐紅確粟短襖白裝
緜饑療秋冬日寒支雨雪天若曹歡可得那復計

金錢燕林李日煥文兩語天際青海河所無
韜鈴小計想南來八楚對常寶珠璣
親指授奉命出神京雁旅雄兵集瓜期上將更馳
書江左地會食海邊城仗爾風帆力催糧曉夜行
振舵南人技何愁百尺濤方隅能底定官弁有微
勞令肅民高枕
恩深士飲醪紅旗消息在遠望首頻搔

人入蔡功當以李涼國爲第一而昌黎平淮西
碑專美裴相爲士卒所訴乃詔令段文昌
別撰宋時有陳珣者守蔡州復磨去段碑

而刊昌黎所作文論者快之予獨以爲不
然唐欲建中興之業方恃諸將用命以聳
動天下徒以一碑故而使賞罰失措人心
解體此當日之大患也帝雖以裴相之倚
重有所不顧而毅然易之可謂明且斷矣
彼獨曰韓文自足千古段文昌何爲者嗟
乎文之別撰爲一時利害計非爲來世美
觀也人主卽愛才其愛一文必不若自愛
其國家也明甚而論古者聚訟紛紜甚無
謂也故以詩紀之

淮西夜燕罷風雪戒旌旗曉縛元濟出諸帥猶未
知囊韃迎丞相下車驚欲辭豈惟功第一謙德亦
冠時紀勲少特筆昌黎誠阿私伏闕衆怒集穹碑
輒磨治文易段文昌歲久苔蘚垂太守宋腐儒讀
碑謂無奇翻駁前代案再刊韓公詞後人識何淺
從旁反快之校讐二碑文但爭厥妍媸豈知長安
中衆口更有碑韓語無虛飾焉用易段爲小雅歌
方召故實亮可稽不聞周士卒訟言采薇詩

長至夜夢操舟大溪中波流拍岸竹色連雲
意甚樂之高唱五言律詩一首及醒忘其

發端乃更足成焉

風吹我夢去忽棹小舟行一川流翠碧萬竹映空
明川爲誰氏鑿竹自何年生青山笑不語烟靄向
人橫

野寺

不知何夕夢曾到此招提拍岸蒼波活連雲灌木
齋無僧香積飯有鴿佛身棲車馬應難到空階草
自萎

入港

入港潮頭急舟行仗艫強一村圍瓦屋兩岸熟香

杭斷壩沈沙白高林墮葉黃只應歸宿鳥見我對
壺觴

陳東橋畫蘭

東橋畫蘭蘭有骨白玉珊珊態生活水匳淡破墨
一痕花影花身兩明月或于山頂或厓傍紛披烟
霧含春光圖成邱壑寄贈我挂壁十日東風香掃
盡穠華輕著筆人怪此花太疎逸那知楚客離騷
意朱碧雙鉤寫不出叢叢都向石罅垂紫苞粉箭
開參差泉聲轉處竹陰亂髣髴坐我江南陂眼見
君圖妙無數變幻朝昏更晴雨何當購作巨帙裝

便是人間寫蘭譜

數載不至吳門交遊間有傳子物故者眉洲
歸而述之戲賦此篇

憶遊西山未五載鏡裏朱顏猶好在怪說訛傳徧
吳下事偶然耳非君給文洲住世如虛舟死可卽
去活亦畱此事但憑造化主竟坐踈嬾不見收當
君薄醉悲歌夕碧嶂丹溪招予魄豈知窮餓海濱
身料理生涯正無策春風昨日送君歸梅花殘雪
香滿衣逢人問訊尙無恙始駭前說真非非君不
見密室幽窗坐十笏夜半波濤聲忽發開門一笑

月在空破廡枯其馬爭齧

題蔡得硯春江花月圖用唐人張若虛春江

花月夜樂府韻

春江水淺練帶平春江水深縠皺生珠簾捲罷燕
飛入沈沈苕藻涵空明春温九十吳王甸一夜東
風化霜霰花月吟哦自古情春光遊冶時相見無
邊芳草馬蹄塵搖蕩花梢與月輪處處簪花烏帽
客年年舞月羽衣人斟酌芳心春未已月圓花豔
當何似新葩乍展上弦初多少光華照江水倚闌
遠望暮天悠疊疊青山解客愁錦障橫遮隔江路

金繩低掛傍江樓南州才士興徘徊好仿清辭咏
玉臺霽雪影中行獨到落英堆裏臥還來酣飲笙
歌空際聞風流裙屐共推君思歸張翰能行樂送
別江淹善作文中流映月岸栽花小築春光便住
家畱月多教白雲住間花復有綠楊斜我欲推帆
冒烟霧披圖省識尋君路春江渡口好攜尊共沐
蟾輝倚芳樹

至圓津禪院觀畫贈慧上人次冶堂韻

鼓棹三畝蕩來遊叩梵宇門闢市橋邊一徑蘼花
古問詢有畫僧傳派自其祖日尋畫中趣楮墨幻

烟雨能究昔賢法頗得鉅公許掩關常作畫落筆
殊楚楚技固可人意品不與俗伍精舍號墨花結
構數弓土幾歷衣鉢傳謹守釋氏緒栖禪秉戒律
會食共規矩性定井瀾寒意超鵬翅翥觀理觀畫
同一一照如炬招邀及時彥蓮社謀再舉我儕異
淵明胸不設城府當挈赫蹠賡時到優曇圃雄辨
角設塵大尊較酒戶皎如七寶月燦若五雜組畱
題好句出其妙不可數慧師當此際應亦下轉語
况有大馮君後約期避暑師固愛客者所見不相
齟肯開清華閣許輯畫人譜怡情人二三縱目峯

四五來往安樂窩

謂邵西樵丈

道里匪修阻擬從一老

遊恐嫌我性鹵庶幾東橋子眼力豔晴煦近自城
中至能將此義剖于物境界間悠然結勝侶三泖
九峯奇新圖一再譜吾寓由拳城絹素乞寄與今
暫別茲去薄暮返青浦有客煮茗待時同冶堂丈
下榻于得硯
齋莫及譙樓鼓

寄劉春橋

夕陽話別赤蘭橋東去扁舟駕畫橈堤畔柳依雲
渺渺沙頭鶴怨路迢迢此時涼月三更夢後約秋
風幾度潮莫負江鄉新味好紫萸疑喚玉姬調

寶書堂詩鈔卷四

治堂文借書黃酒圖照

上海褚華文洲著

有書不許借人看訂悞誰爲塗亥豕有酒不容貰
人飲知味誰爲論臧否天下豈皆慳吝人痛飲耽
書亦難耳書淫酒癖君固兼醉讀奇文破萬紙雜
誦宵深響未歇宿醒日高眠不起豈無編芸架重
疊日課等身觀易止豈無種秫田膏腴醪會連旬
曩乃恥此計安出旁人愁君曰籌之亦熟矣假將
秘本記弗忘何用珍藏累孫子賒取新笏嘗旣慣

何用旁皇脫簪珥有書借向收書家有酒貰從沽
酒市呼童攜酒更擔書兩願俱償色然喜試問江
南山水間好事如斯復誰是恨我家無石作倉盡
日丹黃攤棐几愧我厨無麴如邱六時壺尊瀉淮
水學君此法恐遺漏更欲從君窮厥旨紛紛換閱
則憑吾擾擾索逋焉禦彼不豈曾到古人獄為
謁陳大樽先生墓次得硯韻不豈曾到古人獄為
富林斜日氣悲涼弔古舟維岸口楊黃土無情封
窀穸綠波何幸擬瀟湘尙書池館烏啼月都督門
庭客賣漿天地只應名節重一抔峯泖借餘光

子白索題煤屋讀書小照

梅花香作心高人玉爲骨把卷深山中夜夜抱烟
月月明照君影隨君光不沒紅塵忽倦遊言歸雲
水窟人從故道歸花亦舊枝發岩巒迴合處有屋
容十笏消受春風香攤書坐兀兀雜誦興自佳清
聲出林樾仿奇我欲來豈怕苔徑滑對語向晴窗
芬芳應未歇

乾隆戊申正月以丙午丁未二年詩寫爲一

編未幾爲俗客竊去作此志憾

總角耽作詩卷帙隨時增草草書滿紙難遽分愛

憎積至二十年鏤板猶未能丙午及丁未所著手
自謄攜向山水間謬得騷人稱誰更癖嗜好智如
掠物鷹忽然竊之去俗子技固恒彼念在襲用味
實炭與冰誤謂詩多諛世語將挾之以覓食也嗟嗟苦吟客愁思朝
夕凝達人托購覓蹤跡初無徵繼乃懸賞購貲薄
人弗膺從茲巫峯秀一角缺峻嶒詩稟共十二卷故妄以巫山爲
比

前詩復筆想成帙得其十之九耳既付裝訂
拈數句題後

晴日映康衢逐景難捕形花既枝上落誰得聞芳
馨予苦失子詩遊心入杳冥漸漸觀所遇途逕如
已經既得恐旋失下筆不暫停縱或忘什一毋庸
歎飄零有時靜思之忽瀟方寸靈食頃亦易獲或
自睡夢醒舌端一回誦心口自丁寧遺漏日可補
半月松關扃彙集復成帙楮墨光熒熒寄聲倡和
者相慶賒醪醕

周仲育家山舟詩

仙人好遊山棹舟每入白雲間漁父常弄舟看山
却泊碧溪頭君家城西先人廬千山東望扁舟如
知君非仙亦非漁林巒自成小隱居山舟得名五

百載勝字天水王孫書當日徵君謝朝市藏書萬
卷餉孫子子孫代有讀書人閱歷三朝尙居此我
來山中信宿畱日坐山舟看山耳生平未見書尙
多一從頭難指示君不見元章子固浮家同縹
緲滿載西復東豈知君舟岸上住不愁風雨掀孤
篷
長風晝號萬壑寒吹樹脫葉溪生湍樓中有客望
雨立四山嵐氣方瀾漫風頭轉急天未雨更禡雲
牙擊雷鼓欲雨不雨景最奇此景誰爲圖畫補詩

來雨樓

如圖畫亦佳哉許渾句奪丹青胎君家造樓仿詩
意時看雨向山中來或云連旬雨難止清簟疎簾
聽尤美何如竟待雨晴時得觀

文虹射天紫

仲育藏有
漢博聞七律詩一章
御題兩

遊馬鞍山

望山橋下宿雨乾居人導我遊馬鞍有城却環馬
鞍後人從城市登烟巒近山隙地數畝寬一徑直
向山腰蟠孤亭小憩更東上梵王殿宇朱闌干門
開塔院在高處下俯絕壁苔花漫欲求碎石掘取
盡但見草綠泥沙丹獨畱一峯大難鑿碧皴鐵骨

神猶完或云岡阜北去好尙有小閣居黃冠地藏
并木復幽邃時許過客來追歡慚子方歌行路難
歸思尙托浮雲端客窗夜夜醉還臥飽聽楓葉吟
何酸故園去亦苦近市學隱擬買吳淞灘築亭種
柳計安出此語合得山鬼謾
畱題小有堂

雲穿棟宇石爲屏吐納清光戶不扃豈特滄浪可

比擬

堂有曹地山宗伯書一
聯蓋比之吳郡滄浪亭

茂林修竹小蘭亭

階下幽溪清復深週遭老木晝陰陰有時葉被風
吹墮一隊魚驚入水沈

橋通大阜石爛斑斜日登臨破客顏林外浮圖如
筍矗遊人遙指馬鞍山

聽歌

風過平泉掃落花縹緗拊上賈人車滿堂歌舞拋
儂去學得三絃似魏家

翩翩裘馬好兒郎老去還登傀儡場里曲歌殘鹽
昔昔馬鞍山背欲斜陽

不識南州文字嬉小來性好學彈詞憐君才比升
庵短了髻紅衫一味癡

山圍團坐客傾囊響撥鷓絃唱霸王漫爲虞兮雙

淚落一家也有小滄桑

醉後至東禪寺門前望月

鹿城酒樓官路隅缸中酒清如沙湖對花獨酌盡
一斗當壚相顧愕且吁少年羣睨二八姝我自踏
月從東趨東禪寺門夜已閉門前地濶野草枯過
橋有路細可辨遙望石塔行委紆喬柯數株夾路
立搖漾月影青模糊雨霜天皎疑向曉枝頭啞啞
嗁老烏母惜寒氣來侵膚此時光景清可娛憶從
茸城僦舍住客到日日聞歡呼月明乘醉或偶出
巷僻水淺茅庵孤今宵佳境幸相值又恨同樂無

酒徒茫茫世事難兩美苛求造化我亦迂

更雨寮天竹

風勒霜花枝上吹便驚紅氣照門楣文珠有母寒
偏孕雲錦爲標曉尙垂楓已消丹如避豔梅還撚
蠟與爭奇憐他翠鳥偷嘗慣時隔翠恩側項窺

貞孝何母費孺人詩

孺人幼字何氏未婚而夫歿誓不嫁以養
其親親沒歸于何又以善事舅姑聞當世
詩二章從孺人嗣子名苴芬請也

錦字才通問偏深同穴情宿盟温鏡暗慟哭杞城

傾水逝難重返花飛不再榮倘非親健在泉土早
捐生

藁砧門戶在辛苦話于歸但執堂前蕢寧裁篋裏
衣田礲終歲食祀續此身依塚樹今連理貞心定
不違

長至夜感興四首寓更雨寮

煮井剗山生計疎紅塵奔走恨何如悞尋海上難
成藥悔別林間小隱居謂我或云君似鼠對人敢
說子非魚騷盟幸得忘機侶觴咏連朝興有餘
解道天涯若比鄰臨流看竹得天真荒城莫擁盤

盤路曠野風含漠漠塵奕可橘中藏四叟虎從市
上證三人陡然立脚寧無據問渡何勞來往頻
叫斷天南鴻雁羣霜隨風落正紛紛客窗吟思看
黃葉遊子歸心托白雲門戶應愁炊玉甌妻孥空
理鬱金裘誰將此夕平安報燈焰微欹酒半醺
碧草池塘月未明巖關夜柝擊初更已無烏鵲風
前噪或使梅花雪裏榮蜃去樓臺猶未泯蝸乾鬢
觸尙相爭故園景物依稀在衾枕寒來夢不成

贈鄔畹香

鄔生結髮求從軍匣藏寶刀星斗文醉中狂歌醒

微笑意氣往往凌青雲通波門側老瓦屋隱遁居
 然漢梅福一時名士願識面窄屐峩冠走相逐拒
 霜花紅秋老時醪飲常到任家池樂山所居有笠池同人常觴咏
 其池波激灑月初上我來喜聽君吟詩別我一舟
 竟何適大帥嗔君落君籍旁人焉知升斗儲難易
 泖湖秋水碧歸家謀生日大難更乏澗阿為考槃
 教授生徒事誠細或云暫却飢與寒吁嗟乎世間
 豈乏九尺馬贈君射獵榆關下日斜張燕笳鼓喧
 行炙美人態妖冶廣筵燈燭雌霓光我橫金戟君
 拍張勳名一雪腐儒恥貂蟬牟兜可兩忘

歲暮次春橋韻

學得雕蟲一技成時名謬擬玉壺清但求青簡為
 家計不對紅塵起宦情入世每持談侃侃依人羞
 鼓翅營營翻雲覆雨貧交慣肝膽相逢莫漫傾
 放棹烟波計未成病依小館坐孤清跋而能履無
 奇策夔尙憐虻亦俗情行比嬌娃春出閣臥同疲
 卒夜投營時病足幾至不能起好方倘許吾嘗試禁苦還將
 藥椀傾

雨夜憶古田莊梅花分韻得花字

龍門寺外寒梅樹土燥苔乾未作花疎雨乍看千

點灑清香應有幾枝斜此時剪燭詩同就何日衝
泥酒共賒寄語東風休著力且畱爛漫照晴霞

分穀求桑圖

種穀欲密樹桑欲稀風條暢達雨葉肥有穀有食
無桑無衣郭外五十畝墻下八百株誰其獲
者婦與夫其綠如染其光如濡穀何爲持作
糜桑何爲抽作絲買帛不服糴米不炊金玉
不可以禦寒雞豚不可以救荒刈之在廩采之在
筐我黻子佩願毋相忘

葛蘆坪丈小影

春風騎馬出潼關身似歸雲一片閒爲有詩逋償
未了短髭撚斷雪爛斑

夢入江南酒味長河聲嶽影墮蒼茫看君手裏明
光杖猶帶秦川花草香

寓居雜感寄吳陶宰翁石瓠

病足囟囟過舊年春來此病尙纏絲欲扶巫峽香
藤杖不瀉錢塘藥玉船竹篠乍生山露翠蓴絲欲
長水浮烟雲間亦有行吟地歎息身如裏繭眠
聞賽元宵燈九枝更籌未定月明時牀羅杯笋追
歡淺墻隔笙簧入聽遲照座無花能索笑忘年有

客且論詩

時與葛丈論詩至漏下二鼓

客窗岑寂尋排遣人共

相憐我更悲

青箱攜得護書囊評泊前人遣夜長豈是韜鈴愚
趙括只應財物累陳湯鳶肩早達文章府蝦臂終
窮鋒鏑場推枕未消餘醉盡古今閱徧事茫茫
晝冷生陰夜冷風春光那肯到簾櫳主逢鄭國爲
東道法許雲門紹北宗遊興如龍空夭矯病驅似
石不玲瓏梅開苦憶山園好萬種芳情破蘚紅

病足偶述八十韻

生平筋骨佳濟勝頗自適矯若升木猱健于鼠地
颯不藉竹一筇時攜蠟兩屐倏忽閱岡身指顧上
山脊花鬪深叢紅箔穿幽磴碧善攀仄徑籐能探
危崖柏體實年方髻言夸日伊昔同渠仙躡屩陋
彼卒走驛當媿道人鐵豈讓衲子白顧子誠輕率
賦命嗟窘迫橐空謀餬口道阻事行役千世笑再
三計里輕千百腹無脛四穿跟有繭重積壯往縱
曰邇來歸亦云驀凶遽便青纏從容羞赤舄人力
固非虧神惡乃降厄去年春正孟先子病彌劇難
投倉公劑竟捐曾氏簣土塊枕夜臥麻衰哭踊擗
血債始弄疥寒傷繼流疫夜欬刻漏永晝悶炎威

赫禁甘使脾泄減餐俾骨腊是時寓院齋遂思返
浦汐養痾松菊園逃暑榆棗宅食能節旦晚面漸
現豐碩擬待餘患掃將把秘方擲離家仍薄遊買
船招莫逆戊申歲除臘乙丑月死魄踏滑勞下體
害瘍先左隻勉強固知艱痛楚弗遑惜尋僧寺遼
濶仿友地幽僻朝出盦獨支暮返趾交躑左者所
好半右者所患亦納履血潘漬脫襪肉片襞外腫
動諸筋中脹亂衆脈夢驚屢推枕驅屈不帖席輾
轉喜被柔欠伸慮牀窄曉寤恒緩起日坐敢勿踏
朋來念歡晤僕至喚扶掖門叩吟詩翁座列嗜酒

客辛辣呼服修鱸香進雞蹠釀溼蟹黃羹畜毒兔
首炙甘饌忘抑搔促膝恣浮拍暢飲才半宵邪火
下兩腋大如啄木喙細如壺蠡螯輕如發弩矢重
如撞戈戟久臥而思坐如以指瓜擘久坐而思立
如以木杖擱自立而思行如被狂犬齧自行而思
止如試新刀割臠顛喪意志創倍忍嚙嗜撫躬數
焦思向人頰蹙額攜書棊几倚溲溺古藤搯厥甚
由歲朝未愈至元夕徒懷道左步枉語轍環迹象
寧利涉川占恨窮困石譽髦謗晉習豔婦訕周卻
茲際衆謗紛曷月吾累釋下砭求國工覓治檢古

冊督任堪切按瑕疵顯發擿油榨蓖麻穗膏煎鉛
汞液去腐屏鋒刃攻蠱殊虺蜴水洗黼煮湯末滲
盞研珀欹斜護竹紙周匝裹軟帛取冷葉薄襯祛
濕鍼密刺潰肌乍銷磨淤癩盡迸塉揩拭需乾淨
沐浴戒鹹渴撫摩聽股裸診視任脚赤要揆物忌
諱勿憚縛改易法自方家傳理宜靜夜獲丹頭涼
抵冰飲劑苦逾藥引燥下腸肚驅熱離肝膈效驗
緣是成厯良就中擇槃堆一寸七囊費數貫索品
具力區辦藥物細籌畫舊汚日以去新美日以闢
血活通入腠肉嫩填滿隙圓轉還筋絡紅暈綻膚

革吾足返粵珠吾軀完趙璧病痊爲歌詩聊述刀
圭益

泖湖潮音閣次蘆坪丈韻

梵宮洲一曲結想到而今草綠生鷗夢波寒證佛
心言尋林下客來作雪中吟落日開帆去風吹鈴
鐸音

蛋魚歌爲沈咏樓作

赤龍繞脊火騰上白龍通身雪沾濡二龍生子不
能破卵出化爲小魚與卵形不殊腸肥腦滿腹下
墜但有鱗甲無髭鬚主人恐其尙欲變化入雲去

戲以盆盎爲江湖赤魚多可網宛若紅珊瑚白魚
俯可拾又如明月珠或有赤白色相間疑忽擊碎
五色瑤璃壺客來坐玩游泳趣惟見揚鬣煦沫袞
袞爭先趨投以餅屑弗卽食慮是鉤餌還躊躇待
之良久乃見一一浮水起詭奇之狀皆可按譜呼
吁嗟乎水鄉豈少鱖與鱸斑皮錯落尺半軀桃花
信到乘潮上充庖則美日不娛何如主人養魚分
赤白兩腮外暴七尾垂委紆

寄楊止白兼呈其令伯退翁及吳陶宰王莧

圃高韻臺姚勉樓諸公

何處居停好無過更雨寮圖書堆几首花木擁墻
腰憶別冬三澣思歸日兩潮新交青眼在過我不
煩招

白髮耽吟客君家老步兵雪天乘夜飲梅渚冒寒
行揮塵羣儒愧濡豪一座驚生平遊戲慣不減少
年情

吾思吳處士獨有古人風詩比西崑豔家同北院
窮烟霞居自僻金石篆尤工高臥惟林下鬚眉漸
老翁

王公辱相訪高子肯來遊東郭新開墅西湖獨泛

舟怨因羌笛晚心托玉壺秋畫壁旗亭裏名誰在
上頭

老屋雙松下姚君舊識名歸帆從浙水聚首又茸
城倚醉寒鐙影行吟落葉聲雋才多放達世浴漫
相驚

自作河梁別家居臥病餘長征謀一棹將共春橋
爲南徐之行
遠思答雙魚月白琴應弄花明徑可除吾曾吟
嘯地風景近何如

淡厓徐丈夢遊小影

化蝶始固樂覆鹿終可哀世人拘真見實爲夢往

來先生醒午夢自言其夢回海大駕大舶峯高臨
高臺指點扶桑日鼓浪聲喧逐大椿一春秋螻蛄
乾爲灰瑤花在絕巘正向東風開叩關觸閤怒竄
伏我馬墮誰憐失道人可托同良媒龍洞要無洞
燥溼君胚胎鐵橋本無橋芬芳君萌芽一悟落千
仞虛幌搖松煤舊遊紀何許羅浮氣佳哉山中煉
丹客倚石相徘徊將毋夢到處屐跡畱蒼苔

蘭花咏

蒼烟漠漠松篁徑萬朵瑤花破春冷月明老鶴飛
上天美人下山踏花影曉露洗東風吹香霧溼衣

君不知心含幽怨立許久修蛾綠過湘江湄

懷顧實夫卽次其寄春橋原韻

城南瘦沈羣中彥定交昔借西風便別墅圖書委
宛山外家人物靈光殿年來鄉里誰同遊顧雍才
推第一流舊業常翻芸卷卷佳篇細繕銀鈎鈎我
念伊人朝復暮遙情祇隔川沙渡黃龍浦口望兼
葭丹鳳樓頭倚烟霧兩地相思明月窗却輸公等
聯吟雙興酣評花鼻出火筆奇賦雪才如江達人
眼底功名小白下開筵醉年少攜筇過嶺穿叢篁
打槳隨波逐飛鳥青溪楊柳綠未枯丁家閣子黃

金鋪畱連歌舞意未足還將餘暇尋當壚苦愛醇
醪味芳烈大斗招搖巨鯨掣張郎婉雅劉生雄傲
睨餘人可弗屑歸舟秋晚秋蕭森虎邱鼓吹催分
襟述君高亮我正憶邱齋喜聽楚然音君逢舊雨
如新得我溯前盟如往跡蒲帆一幅冒寒來擬返
蓬門僅中策墻東放艇市燈殘硯北畱題醉墨漫
知君緣分半離合始知良會如斯難浪遊資斧都
蕭索窮臘依栖暫邱壑饑驅又作天涯行王粲今
時竟誰托騷客湖山有夢魏丈夫襍紗少嘯痕難
忘最是江城夜八咏樓間共酒尊

飲墨莊家小乘買舟送遠峯至齊門別業而
返小乘先成一詩卽次其韻

赤日當街不可走高臥但思人送酒買舟仍泛綠
波來聊爲諸君開笑口哦詩不成酒滿樽擬乘薄
醉歸打門王郎言將送林子招予撥棹來江村五
客同舟其一我更約月明與同坐宵深風露涼滿
身心似春花開萬朶須臾月影却向西更爲世界
開頗梨微風蕩水水弄月冰輪欲墮波心低空瀾
前頭叢樹綠追涼更繞湖堤曲餘醒引得睡魔來
黑子居然爭一局王郎思返林子行誰歌水調百

媚生瓊樓玉宇夢回處却從枕上模糊聽畫橋南
去歸途共上岸微嫌雙屐重手摩倦眼語王郎此
宵我亦煩君送

明日遠峯招同曙堂春橋納涼陰澄湖小乘
獨不至再和遠峯疊前韻作一首

拏舟日日山塘走自詡耽詩實貪酒借此避暑計
亦奇道破我難塞君口白堤酒家玉作尊吳姬如
花紅映門聞歌看舞怕心熱移舟却到菰蘆村無
酒知君亦酷我手揮團扇船頭坐月光到杯悞吞
喫頰上俱生霞兩朶酒空驚顧月欲西半身照入

青頗梨流螢渡水淡無色
個個飛入松篁低暝烟
封盡遙山綠塔影依稀峙
城曲觚稜指點不分明
陡出丹青最新局我從此
地昔經行喜看菜甲干
畦生那知沿湖好秋景
月下更有菱歌聽歸舟
恨不還君共孤吟露溼
單衣重剩將落月滿船
窗不煩船婦挑燈送

題江碧岑女史龍女受經圖照

四天劫火焚袈裟下生胎
結青蓮花現女子相號
龍女卽能合掌稱南無若
波老翁善男子爲轉金
經身不死頂函舍利昔曾
窺長爪龐眉無乃是授

經當日開宗門子孫都成佛
子孫燈光照壁破清曉蒲
團問答來源源一難方生
干偈續如蟻隨珠穿九曲
鈍根居士不敢參貝多葉
上從頭錄吾生學佛佛性
諳未得習靜營茅庵他年
倘踏堅固地渡海肯到香
山南山中六月高無暑聞
道維摩此焉處著衣持鉢
本無人饒舌漫聽豐干語

小吳軒烟雨圖便面爲碧岑作用東坡題烟

江疊嶂圖韻東風起微雨

庸工常畫雨中山容易畫
雨難畫烟世間畫雨程生
好烟生萬壑山蒼然小吳
軒小憶曾到看山坐

飲石井泉是時吳城初日上花柳歷歷明晴川昔
遊今在便面觀樓臺髣髴置我前陰晴胡乃忽變
幻祇有烟雨迷長天東風吹烟復吹雨來洗衆綠
生嬌妍聞門南去十里路鳩婦接翅鳴低田筆牀
茶具冒雨到此約可踐知何年年好景放空過
但買畫舫呼嬋娟飲殘銀燭月墮水露頂船首常
酣眠米顛有靈應笑我懶情難作圖中仙醉鄉魂
夢隔烟雨神遊已結平生緣何須披蓑復戴笠證
我題畫詩盈篇

漢瓦當歌用東坡石鼓韻同汪墨莊方大章

陸鐵簫集鄭堂別業作

祖龍定朔先子丑

秦建亥以十月朔爲歲首

焚棄詩書謾孔叟

一朝真人芒屨生鹿逐峭函不能走倉卒置相刀
筆吏闌入關中搜戶口吹噓楚炬劫灰飛經始新
宮更傳後間架直規般阿四修廣豈止周筵九闌
磨玉瑤鄙城玦棟斲豫樟賤榆柳初安鴟吻次建
甍其制圍圓劣于斗將作計費司空頽燒造幾做
陶人肘刮墜薛暴那敢登如擇良苗屏稗莠不竄
上惟虞舜師稱珍下與曹魏友淘汰旣細質自潤
脫胎真如鳥出殼瓦頭數字列分明匪仿魚龍匪

蝌蚪或祈天命祚炎精或祝帝躬壽黃耆勢奇能
使古法變體正不受俗子嫉比鑄佞盧銘金鏡如
琢嶽山鎮玉卣瞭辨曷必尋離朱摸索亦堪付瞽
瞶運復橐駝載岐陽數厄野火焚响嘍未央雙闕
渺平蕪古瓦猶存一寸厚方隅豈復憶層層欵識
依然書某某圍錢陵土何法加拓本還教君忽有
吁嗟乎高皇除亂定三秦禮樂何曾化柳杻拜爵
王孫出釣魚擁盾懿親起屠狗宮中大會萬戶開
砍柱豪呶作儕偶朝興長樂貯紅妝晚築新豐娛
白首公侯猶且供驅役徒役寧能贖笞培茫茫前

事何足云遺物近古差可取矧茲字畫異贗作爲
君出篋拂塵垢緡閱軒窗一日佳流傳子孫百世
守蠟磚猶弔二世亡采甃未逐灌嬰朽苦無妙蹟
擬斯豈讓汝人間享上壽王新城居易錄云客有
持阿房宮磚求售者方
二尺許作蜜蠟色宋商邱筠廊二筆云
灌嬰廟瓦形如葵花有翡翠丹砂文

僬僥國人

僬僥國人長一尺出遊偶被閩商獲竹籠貯之不
打頭處處提攜出海船饑能乞食寒亦衣語言啁
唧知音稀時還揮淚望鄉國似苦萬里身難歸鄉
國何方作棲處穴土穿山同鳥鼠豈無豔婦與嬌

兒癡立蓬蒿猶盼汝孤身俯仰誰汝憐懊恨且莫
終天年亦堪騎羊臂桑扈縱獵散悶長江邊我來
覷汝弗佈死形軀我亦中人耳車輪刮頸劍挂頤
世間尙有汪芒氏

熱美

不向蓬萊住人間暑莫逃紅塵添十斛碧水縮三
篙飛鳥思栖樹行人催解袍定需瓜似蜜出井自
操刀

與客避暑滄浪亭

畱客乘涼老衲家松杉深處切浮瓜清風愛我時

來坐更送白雲屋上遮

斷船歎

山塘船戶李氏子生小弄船作兒戲倚棹碧波間
來往疾如駛時常已酉秋遊人聚蜂蟻李船撞鄰
船船覆溺人死里正報縣官縣官出新意鳴鉦忽
然來輿從數十吏俄聞一號呼舁船登平地船首
昂向天如人反接至人掉船罪船人船撞人罪船
身議加以法刀鋸陳膊膊拆船棚轟轟截船腹船
雖不能言船人代斛鯨提攜襍被沿岸哭今夜全
家上頭宿

慧山泉

生平一恨事未嘗
慧山泉揚帆到山下
往往却不前山靈
至今秋忽然假我緣
松風吹緩步轉入寺
右偏池養尺半魚有
亭臨翼然泉流出山
頂四散流涓涓泉脉
結亭中鑿竇分方圓
土人就井汲日夕滿
池濺瀾茗招客飲善
用活火煎解渴卽第
一持論何必堅苟取
中冷飲未必成飛仙
同遊謂余語通方合
聖賢誰將此詩去以
示陸鴻漸

秦氏園亭

園依慧山麓經始自
何年結榭分嵐翠疏
池引礪

泉暝雲穿棟出曉曙
隔墻傳共向松陰坐
分明畫裏仙

登北固山望大江

路繞南徐城郭來遙
觀北固氣佳哉天生
樹木山腰出僧築樓
臺雲際開屯戍橫江
茲險要英雄據石昔
徘徊不孤吾輩登臨
興各盡秋風酒一杯
前生陸地看金焦誰
豎長江瀉怒潮冉冉
中流出並峙茫茫終
古水難消鐘魚日落
聞三郡鷗鷺風寒下
九霄倘有神仙峯頂
住此間舉手可相招

曉發

野店寒雞喚客初便扶殘夢上疲驢著衣霧氣乘
秋冷到眼星光向曉疎水際橋常通通仄松邊徑
自破空虛僕夫漫惜燈將燼尙有銜山月似梳

渡九岡十八灣

山向秣陵走直逼城門陽其勢不得住連屬爲九
岡岡身兩頭偃有如角弓張後岡下未已前岡已
相望縱轡登高處俯視皆松篁人家出林際多少
殊可量俄頃到平地眼前景忽藏回視嚮所歷居
然摩穹蒼旣盡十八灣土壘始寬長從茲入塵市
擾擾輪蹄忙珍重曉嵐氣淋漓在衣裳

劉霞裳招同遠峯登雞鳴山寺望後湖

與君今日上崔巍又是秋風一度來樵徑松篁連
市起佛堂闌檻面湖開時平戰馬眠芳草地古荷
花種劫灰六代如烟招不得遊人莫放手中杯

隨園呈袁簡齋太史

六街車馬鬧飛埃遠繞清涼山脚來市近地開新
路徑仙居人說好樓臺登堦風雅看前輩出袖詩
篇愧大才先生品隘海內詩人謬以大才見許那得住鄰楊子宅時
時問字此徘徊

古木修篁列似環不將墻壁界青山天然花發香

千種自在泉流碧一灣篋有奇書曾盡讀門無俗
客不須關閒來偶倚闌干立人在蓬萊縹緲間
先生歸隱及韶年舊是瀛洲侍從仙升斗非榮辭
上考山林好住誓高眠境親魚鳥三分水窗鎖星
辰五色天憶我前遊曾未到乾隆甲辰三月以先
生在粵未及遊竟
重摩粉壁寫新篇

白下秋風動曉涼木犀紅處約傾觴烟霞勸客晴
光媚潮汐催人歸棹忙背指山川懷鄂社傾囊文
字愛齊梁從茲摩詰還同傳紙墨新添一倍香先
寓書松太觀察張警堂先生云康畫超逸逼似董
香光褚詩繁富有唐宋大家風味謂寧齊與華也

寄李嗇生廣文

月到新晴著意明看花小住秣陵城曾無好句畱
山水枉有高賢問姓名沽酒重來秋興淺囊琴獨
返客裝輕何當相訪期他日北渡江濤萬馬聲

遊興

扁舟海上捲蒲筵來臥金閨水閣清詩味易容成
淺率酒懷勉強到和平蠶欺花亞殘猶采燕望巢
寬好更營社日一過秋寂寂天公應笑太癡情
莫怪看山去獨遲輕舟也要順風吹愁多眠食難
如舊秋老陰晴無定期那得醉人同望月只餘病

僕伴吟詩窗前叢桂紛開日客况孤清愧爾知
市有香醪艇有魚白門秋葉照人初紛紜欲散橫
江權局促還驅上嶺車學舞自愁腰未細投壺誰
恕法全疎歸時倘采夫容贈爲寄山中一紙書
不爲槐花策騎忙也傾酒琰看山狂吹燈鬼怕稽
康達習韻人思沈約長十有九空求試篋百無一
可媚時妝何如但夢烟霞去靜叩秋舩咏夕陽

題楊心香瓊臺集

長洲三月開花榜爭買驪駒走相訪英筠姊妹合
天生皎潔雙珠初入掌妝成新樣兩娥娥阿姊吹

簫妹按歌芍藥簾櫳臨水好鴛鴦帳幔得春多儂
家生小長洲住樓上玻璃照行路倘得評花妙手
逢流連索寫屏風句郎是揚州蕭伯梁肯溫柔處
卽爲鄉定情一夕扶殘醉蘭麝香濃不下牀蛾眉
擁抱真雙美願作楊花入窠裏誰偏偷賞眼波兒
便欲分栽錢樹子河橋餞飲飭中厨贈別殷勤解
繡襦只怪篙師何太急輕穿小艇出姑蘇憐他落
籍隨歡去飛絮遊絲不知處寂寞烟花南部名從
茲阿妹前頭署幾年望遠白雲迷惡耗傳來自粵
西已分戍邊駝鐵馬敢求救罪降金雞才人信具

回天力幕府尋將舊相識金高北斗用無門片語
偏能贖傾國鄉縑脫却送歸來共盼蒲帆及早回
喜語朝朝占鵲噪好花夜夜剔燈煤歸來話舊重
開燕舊事烟雲易更變已拚玉骨葬蠻郊豈意此
生見君面此生離合總傷情釵鏡休忘昔日盟打
疊驚魂尋好夢爲君歌舞到深更歡娛難卜平康
暇高髻雲鬟一朝罷拚描綈囊買笑資妥孃竟逐
眉生嫁樓空燕子語雕梁門掩桃花開夕陽細述
瓊臺勝遊事再教樂府譜淒涼

送李復軒客山左

十里郵亭楓葉丹衝風送客又江干去沽魯酒霜
初落歸憶吳歌夜易闌薄宦君猶謀旅食貧居我
更負儒冠故鄉豈是栖遲地漫說前途行路難

江橋墨莊過訪作

吾遇昔日交如讀曾讀詩吾遇今日交如著未著
綦二者皆在眼其妙洵可思墨莊來海上沽酒訂
夙期伴結王伯子新歸自京師短筵促膝坐燈
花逼鬚眉人生兩浮萍聚散共一池偶然合根蒂
蹤跡何猜疑只愁波浪濶時有天風吹

又一首與墨莊

年來事奔走在家曾幾時憶從酷暑候觸熱銜君
卮今君冒冷至風雪壓舟桅吾謂冷與熱出門兩
不宜爾我苟富貴安居尙求醫造化亦公道賦此
鐵石肌來往山水間足力終弗疲勿用過愛惜是
物天所尸

處山芝仙過訪不值旣而相見于西園爲謀

小飲予於是夕卽抵郡因賦詩志別

莫怪耽遊不住家招尋隔水路非賒市中酒食燈
無燭臘後園林葉當花入世心情誰雪冷悞人途
徑獨雲遮春風豈是催儂去也挂蒲帆十幅斜

楊瑤塘小影寫宋人梨花院落柳絮池塘詩

意

衝烟大槪江湖夢鐵笛愁聽作三弄鶯花拋却故
鄉來作客時時走相送我亦紅塵落魄人畫圖何
處著閒身梨雲淡白柳浪碧樓臺日夕娛青春一
春觴咏名園裏富貴神仙但如此劇誇燈火與笙
歌只是看人行樂耳君何不買官九品田百弓揚
州騎鶴腰纏充作詩空戒寒乞語風月笑人啼候
蟲

馬

根德無異... 若終... 亦...

亦... 亦... 亦... 亦...

善... 善... 善... 善...

德... 德... 德... 德...

善... 善... 善... 善...

商... 商... 商... 商...

意

蘇... 蘇... 蘇... 蘇...

蘇... 蘇... 蘇... 蘇...

